

昭

代

典

則

昭代典則卷之七

賜進士太子少保刑部尚書晉江黃克昇編輯

吳郡陸翀之校

金陵周曰校刊

太祖高皇帝

辛亥四年春正月丙戌中書左丞相李善長致仕以汪廣洋爲中書右丞相胡惟庸爲中書左丞○丁亥命征西將軍湯和征虜前將軍傅友德等分道伐蜀

先是

上遣湖廣行省平章楊璟招諭明昇璟至蜀諭以禍福使奉國入覲明昇率於羣議不能決璟還復以書曉之

復不能從。既而蜀將失友仁寇興原。

上乃命中山侯湯和爲征西將軍。江夏侯周德興爲左副將軍。德慶侯廖永忠爲右副將軍。暨楊璟葉昇率京衛荆湘舟師由瞿塘趨重慶。賴川侯傅友德爲征虜前將軍。濟寧侯顧時爲左副將軍。暨何文輝等率河南陝西步騎由秦隴趨成都。

上諭和等曰。今天下大定。四海莫安。惟川蜀未平耳。朕以明玉環嘗遣使脩好。存事大之禮。故於明昇憫其稚弱。不忍加兵。遣使數加開諭。冀其覺悟。昇乃惑於羣言。反以兵犯吾興元。雖敗。而心終懷嚙噬。不可不討。今命卿等率水陸舟師。分道並進。首尾攻之。

侍彼疲於奔命勢當必克但師行之際在肅行伍嚴糾律以懷降附無肆殺掠昔王全斌之事可以爲戒卿等慎之仍命宋國公馮勝往陝西脩城池衛國公鄧愈往襄陽訓練軍馬運糧餉以給征蜀軍士

詔禮部叅攷祀郊廟社稷日月諸神冕服并百官陪祭冠服之制

禮部議奏

上親祀圓丘方丘宗廟及朝日夕月服衮冕祭社稷太歲風雲雷雨嶽鎮海瀆山川先農皆用皮弁服羣臣陪祭各服本品梁冠祭服從之

製玉圖記

俱以蟠龍爲紐。其一方一寸五分。文曰廣運之記。其一方一寸二分。以賜中宮。文曰厚載之記。其一方一寸二分。高一寸六分。以賜皇太子。文曰大本堂記。

建園丘。方丘。日月社稷山川壇。及太廟于臨濠。○御史臺進擬憲綱四十條。

上親加刪定。詔刊行頒給。因謂臺臣曰。元時任官。但貴本族。輕中國之士。南人至不得入風憲。豈是公道。朕之用人。惟才是使。無問南北。風憲作朕耳目。任得其人。自無羣蔽之患。殿中侍御史唐錄對曰。臣聞元時遣使宣撫百姓。初出之日。四方驚動。及至畧無所爲而去。百姓爲之語曰。奉使宣撫。問民疾苦。來若雷霆。去若收鼓。至

今傳以爲笑。今陛下一視同仁。任官惟賢。尤重風憲。明立法度。所以安百姓。興太平。天下幸甚。臣等敢不精白一心。欽承聖意。

命給守邊將士綿襖。

上謂中書省臣曰。今日天寒。有甚於冬。京師尚爾。況北邊荒漠之地。冰厚雪深。吾守邊將士甚艱苦。爾中書其以府庫所儲布帛。製綿襖。運赴蔚。朔。寧。夏等處。以給將士。省臣對曰。守邊將士衣襖。歲有常供。無庸再運。上曰。將士雖有常供。朕固知之。特以今天寒。異於常時。故命加給耳。古人匹夫不獲引咎。在躬。況守邊將士。尤朕所深念者。其給之勿緩。

脩治廣西興安縣靈渠三十六陡

興安屬桂林府其水出海洋山自秦開桂林象郡鑿渠興安分爲湘漓二水建三十六陡甃石爲閘以防水泄漢馬援嘗脩築之故世傳爲援所立歲久堤岸圯壞至是始脩治之水可溉田萬頃

以刑部郎中劉惟謙爲本部尚書

上諭之曰膏粱所以充饑藥石所以療病使無病之人舍膏粱而餌藥石適足以害身仁義者養民之膏粱也刑罰者懲惡之藥石也爲政若舍仁義而專務刑罰是以藥石毒民非善治之道也今權輿爲刑官之長用法之際常體古人欽恤之意則張釋之平定國皆何爲矣

卿其勉之。

命各行省設科取士連試三年自後三年一舉著爲定例  
○建奉先殿于宮門內之東○戶部奏定淮浙山東中鹽  
之例○故蒙古遼陽行省平章劉益以遼東州郡地圖并  
籍兵馬錢糧之數遣使奉表來降詔置遼東衛指揮使司  
以益爲指揮同知○策試進士于奉天殿賜吳伯宗等一  
百二十人及第出身有差○如令進士釋褐行釋菜禮○  
中書省奏給宦官月俸三石命但月支廩米一石不許月  
俸開端○命工部遣官往廣東買耕牛以給中原屯種之  
民○命中書省戶部定文武官歲祿○廣西衛指揮僉事  
左君弼等平溪洞蠻獠賜帛有差○詔定武官襲職之令



凡大小武官亡沒悉令嫡長子孫襲職有故則次嫡承襲無次嫡則庶長子孫無庶長子孫則弟姪應繼者襲其職如無應繼弟姪而有妻女家屬者則以本官之俸月給之其應襲職者必試以騎射之藝如年幼則優以半俸沒於王事者給全俸候長襲職著爲令

詔有司祭歷代帝王於陵寢不許祀三皇廟

禮部奏前代聖帝賢王自唐以來皆祭于陵寢唐玄宗嘗立三皇廟于府州縣春秋通祀而以醫藥主之甚非禮也

帝曰三皇繼天立極以開萬世教化之源而汨於醫師其可乎自今命天下郡縣毋得襲祀止命有司祭於陵

寢禮部復議三皇五帝三王漢以下創業之英主守成之賢君歲時俱宜一體祭於陵寢

帝曰古先聖帝賢王以及歷代帝王曾主中原安人民者皆春秋祭祀偏安之君雖賢不祭主中原而昏愚者亦不祀禮部復定議今祀帝王三十五在河南者十陳州祀伏羲商高宗孟津縣祀漢光武洛陽縣祀漢明帝章帝鄭州祀周世宗鞏縣祀宋太祖太宗真宗仁宗在山西者一榮河祀商湯在山東者二須成縣祀唐堯曲阜縣祀少昊在北平者三內黃縣祀商中宗滑縣祀顓頊高辛在湖廣者二鄆縣祀神農寧遠縣祀虞舜在浙江者二會稽縣祀夏禹宋孝宗在陝西者十五中部縣

祀黃帝咸陽縣祀周文王武王成王宣王漢高帝文帝  
景帝與平縣祀漢武帝長安縣祀漢宣帝三原縣祀唐  
高祖醴泉縣祀唐太宗蒲城縣祀唐憲宗涇陽縣祀唐  
宣宗歲祭用仲春仲秋朔復命陵寢所在禁民無得樵  
採置牌刻祭之月日牲帛之數於其上俾所在有司守  
之以爲常式。

閏三月甲子命吏部定內監等官品秩

上謂侍臣曰古之宦豎在宮禁不過司晨昏供役使而  
已自漢鄧太后以女主稱制不接公卿乃以閹人爲常  
侍小黃門通命自此以來權傾人主及其爲患有如城  
狐社鼠不可以去朕謂此輩但當服事供禁豈可假以

權勢縱其狂亂。吾所以防之極嚴。但犯法者必斥去之。不令在左右。戒履霜堅冰之意也。

諭省臺辨人稽正

諭曰。朕謂子日知務學。必擇端謹文學之臣。宮僚之職。日與之居。講說經史。畜養德性。博通古今。庶可以承藉天下國家之重。但人之相與氣習易移。與正人處則日習於正。如行康衢不爲偏岐所惑。若與邪人處則日習於邪。如由曲徑往而不返。不覺入荆棘中矣。省臣對曰。知人最難。邪正亦未易辨。上曰。尊德樂義斯爲正也。便佞褻慢斯爲邪也。故驕奢淫佚鮮不由於褻慢。而端莊中正必皆本於好德。

以兵部尚書劉直爲治書侍御史

上諭之曰臺憲之官不專於糾察朝廷政事或有遺闕皆得言之人君日理萬機聽斷之際豈能一一盡善若臣下傾意順旨不肯匡正則貽患無窮今權卿爲侍御史居朝廷之上當懷寒謬之風以爲百官表率至於激濁揚清使奸邪屏跡善人彙進則御史之職兼盡矣○上嘗御東閣方免冠而櫛御史中丞陳寧侍御史商嵩來奏事

上見之遂移入便殿遣人止寧等毋入櫛已正冠出閣始命寧等入見

平章楊璟進次阻漕不利

是月平章楊璟率師進次夔州大溪口。先是蜀人自謂瞿塘天險，遣其平章莫仁壽守之。以鐵索橫斷關口。及聞王師臨境，又遣左丞相戴壽、平章鄒興副樞飛大張益兵爲固守計。壽等於鐵索外，北倚羊角山，南倚南城寨，鑿兩岸壁，引纜爲飛橋，三平以木板置砲石。木竿鐵鏡其上，傍橋兩岸復置砲，以拒我師。於是璟遣指揮韋權率兵出赤甲山，以逼夔州。指揮李某出白鹽山下，逼夔府南岸，以攻南城寨。璟與都督僉事王簡出大溪口，進攻瞿塘，扼江之衆。璟戰不利，於是赤甲白鹽之師亦退還歸州。

夏四月丙戌，潁川侯傅友德克階州，遂克文州。

先是友德陛辭。上密諭之曰。蜀人聞吾西伐。必悉其精銳。東守瞿塘。北阻金牛。以拒我師。彼必謂地險而吾兵難至。若出其不意。直擣階文門戶。旣墮。則腹心自潰。兵貴神速。但患卿等不勇耳。友德受命。馳至陝。集諸道兵。揚言出金牛。而使人潛覘。知青州果陽空虛。階文雖有兵壘。而守備單弱。於是引兵趨陳倉。選精銳五千爲前鋒。攀緣山谷。晝夜兼行。大軍繼之。直抵階州。蜀守將平章丁世真率衆來拒。友德擊敗之。生擒其將雙刀王等十八人。世真遁去。遂克階州。進至文州。距城三十里。蜀人斷白龍江橋。以阻我師。友德督兵脩橋以渡。至五里關。蜀平章丁世真等復集兵據險。都督同知汪興祖雖

馬直前。中飛石死。友德怒。奮兵擊攻破之。世真僅以數騎遁去。遂拔文州。

庚寅命永嘉侯朱亮祖爲征虜右副將軍率師助伐蜀。○癸卯傳友德克綿州。

傳友德兵徇下江油彰明二縣。遂趨綿州。將至友德乃選精銳鼓行而前。別遣都督僉事藍玉夜襲其壘。蜀守將向大亨軍驚擾達旦。友德麾兵乘之。俄大風起。諸軍順風縱擊。蜀兵大敗。遂克綿州。龍驤衛指揮史鑑戰死。大亨走保漢州。

五月乙卯詔兌江西秋糧。○乙亥詔兌兩浙秋糧。○六月壬午傳友德克漢州。



友德兵至漢州阻水不得渡乃命軍中造戰艦百餘艘時蜀人雖失階文猶恃漢水自固及聞我師造舟進取乃益震恐已卯戰艦成友德將進兵漢州欲以軍中消息達湯和而山川懸隔適江水暴漲乃以水牌數千書克階文綿州日月投漢江順流而下蜀守者見之爲之解體初蜀人命僞丞相戴壽僞太尉吳友仁等悉衆守瞿塘以扼三峽之險及聞友德破階文擣江油壽等乃與友仁分瞿塘守兵還援漢州以保成都未至而友德舟師已逼漢州向大亨悉兵戰于城下友德選驍騎擊敗之旣而壽等兵至友德下令諸將曰彼勞師遠來聞向大亨兵敗必洶洶一戰可几也乃親帥師迎擊壽等

大敗之。遂拔漢州。壽與大亨走城都。臨江侯陳德追擊。又敗之。友仁走古城。德德乃以濟寧侯顧時守漢州。自將擊古城。又大敗其衆。友仁自古城遁還保寧。

辛卯。德慶侯廖永忠克夔州。

先是。中山侯湯和兵發歸州。進攻瞿塘關。以江水暴漲。駐師大溪口。上聞湯和欲候水平進師。恐其逗遛緩事。乃詔和曰。傳將軍率精銳冒險深入。克階文諸州。及青州。果陽白水江之地。兵旣越險。次于平川。蜀人無險可恃。正當水陸並進。使彼首尾受敵。疲於奔命。平蜀之機。正在今日。若候水退然後進師。豈不失機。慢事。且朕前日所以語爾者。獨不復記憶乎。何怯之甚也。德慶侯廖

永忠聞命卽率所部先進和猶遲疑未決反得友德木  
牌於江流延進兵自白鹽山伐木開道由紙牌坊溪以  
趨夔州永忠兵至舊夔州先是僞蜀丞相戴壽等守瞿  
塘關及還兵內援乃留平章鄒興副樞飛天張守城至  
是聞永忠兵至出兵拒戰永忠分軍爲前後陣軍旣接  
乃出後軍兩翼旁擊之興等大敗明日復併兵攻之擒  
其元帥龔興殺溺死者甚衆辛卯廖永忠進兵瞿塘關  
永忠以山峻水急而蜀人設鐵索飛橋橫據關口我舟  
不得進乃密遣壯士數百人舁小舟踰山度關以出其  
上流人持糗糧帶水筒以禦饑渴山多草木令將士皆  
衣青蓑衣魚貫山石石間蜀人不知覺也度其已至乃

率精銳出黑葉渡。分爲兩道。夜五鼓。以一軍攻其陸寨。一軍攻其水寨。攻水寨將士皆以鐵裹船頭。置火器而前。黎明。蜀人盡銳來拒。永忠已破其陸寨矣。旣而將士昇舟出江者。一時俱發。上流揚旗鼓譟而下。蜀人出不意。大駭而下流之師亦擁舟前進。發火箭火炮夾擊。大破之。其將鄒興中火箭死。遂焚其三橋。斷其橫江索。擒同僉蔣達等八千餘人。斬首千餘級。溺死者無筭。飛天張鐵頭張等皆遁去。永忠入夔州。明日中出。侯湯和兵亦至。永忠乃與和分道並進。和率步騎。永忠率舟師。約會于重慶。

戊戌蜀僞平章丁世真陷文州。指揮僉事朱顯忠死之。復

明倫彙編 卷之十  
寇秦州敗走爲其帳下小校所殺

傅友德克文州留指揮僉事朱顯忠守之僞夏平章丁世真令番寇數萬來攻顯忠戰而却之僞夏趙元帥復與世真合兵攻城城中食且盡外援不至部下皆曰與其陷死地孰若出城求生路乎顯忠厲聲曰爲將守城城存與存城亡與亡豈有求活將軍耶詰旦世真攻圍益急顯忠遂出兵東門拒戰而世真復攻西門日且暮顯忠被傷褰瘡決戰力不支城破爲亂兵所殺千戶王均諒被執不屈蜀人磔之于文州東門初顯忠領士卒七百餘人及城破僅二百人旣面友德調兵來援世真棄城遁去事聞使祭顯忠均諒厚恤其家僞夏守金州

九龍山寨平章俞思忠聞傳友德已克階文遂率其官屬軍民二千三百餘人詣軍門降獻良馬千匹友德遣人送思忠等至京上命還其馬賜第居京師仍賜思忠米五石錢六千餘各有差世真復率其餘黨寇秦州攻圍五十餘日城中食盡括牛畜以食軍傳友德調兵來援遂擊走之世真逃竄山谷自以拒敵官軍殺傷者多懼不敢出夜宿梓潼廟中爲帳下小校所殺及蜀平小校赴京言狀中書省臣奏請賞之上曰小校殺本管非義也何賞爲不許

以李信詹同爲吏部尚書

諭曰吏部衡鑑之司鑑明則妍媸無所遁衡平則輕重

得其當蓋政事之得失在庶官任官之賢否由吏部卿等居持衡秉鑑之任宜任公平以辯別賢否毋但庸庸碌碌克位而已

德慶侯廖永忠中山侯湯和至重慶明昇詣軍門降

永忠率舟師自夔州乘勝抵重慶是日次銅鑼峽明昇與右丞劉仁等大懼仁勸明昇奔成都母彭氏泣曰事勢如此縱往成都不過延命旦夕何益仁曰然則奈何彭氏曰大軍入蜀勢如破竹今城中軍民雖數萬皆膽破心怖豈能效力若毆之拒戰死傷必多亦終不免也不如早降以免生靈於鋒鏑明昇遂遣使詣永忠軍全城納款永忠以湯和軍未至辭不受癸卯湯和至重慶

會永忠以兵駐朝天門外。是日明昇面縛啣璧與母彭氏及其右丞劉仁等。奏表詣軍門降。和受璧。永忠解縛。承制撫慰。下令將士不得侵掠。撫諭戴壽何大亨等家。令其子弟持書往成都招諭。遣指揮萬德送明昇等并降表于京師。

壬寅故蒙古右丞張良佐左丞房昌遣使貢馬上蒙古所授印章宣勅金牌及獻賊殺劉益之賊。

先是故元平章劉益以遼東之地來降。朝廷遣斷事官吳立往宣詔。置遼東衛於得利龐城。以益爲指揮同知。未幾故元平章洪保保馬彥輩共謀殺益良佐等。率部下擒彥輩殺之。保保走。哈出營遼東之衆因推良佐



與高權衛事。至是良佐以其事來聞。仍上其事于中書省。曰。故指揮同知劉益。總持戎旅。鎮撫遼東。知天命之有歸。遂全師而款附。寵承明詔。賜以印章。錫賚有光。感懷無極。蒙設遼東衛治。俾之仍典鎮兵。方盡小心。遽罹凶禍。賴多士之協心。執渠魁而就戮。乃推良佐等。暫權衛事。統率諸軍。顧才德之劣微。懼弗堪於荷負。况本衛地方遼遠。僻處海隅。肘腋之間。皆爲敵境。其元平章高家奴。固守遼陽山寨。知院哈刺張。屯駐瀋陽古城。開元則有丞相也。先不花之兵。而金山則有太尉訥哈出之衆。彼此相依。互爲聲援。今洪保保逃往其營。必有構兵之讐。乞留朝廷所遣斷事官。鎮撫軍民。先將擒到逆

黨八丹知院僧兒械送京師。及前遼陽行省山東行樞密院銀印各一。軍民大小衙門銅印八十五。并各官所授前元宣勅金銀上。右丞相汪廣洋等以聞。上以吳立張良佐爲遼東衛指揮僉事其餘將校從本衛定擬職名奏聞。銓注

戊申製宴享九奏樂章

吏部尚書詹同禮部尚書陶凱製宴享九奏樂章成。上之。其曲一曰本大初。二曰仰大明。三曰民初生。四曰品物亨。五曰御六龍。六曰泰階平。七曰君德成。八曰聖道成。九曰樂清寧。先是上厭前代樂章率用諛詞以爲容悅。甚者鄙陋不稱。乃命凱等更製其詞。旣成。上命協音

律者歌之謂侍臣曰禮以道敬樂以宣和不敬不和何以爲治元時鼓樂俱廢惟淫詞豔曲更唱迭和又使胡虜之聲與正音相襍甚者以古先帝王祀典神祇飾爲舞隊諧戲殿廷殊非所以導中和崇治體也今所製樂音頗協音律有和平廣大之意自今一切流俗諛諂淫褻之樂悉屏去之

秋七月辛亥編存心錄成

上謂諸儒臣曰朕聞歷代賢君事神之道罔不祗肅故百靈効祉休徵類應及乎衰世之君罔知攸敬違天慢神非惟感召災譴而國之禍亂亦由是而致朕爲是懼每於臨祭必誠必敬惟恐未至故命卿等編此書欲示

鑒戒。夫水可以鑒形。古可以鑒今。其編所載善惡。豈惟行之於今。將俾子孫。以爲法守。

遣使齎書諭訥哈出

遼東衛遣人奏言。元將訥哈出據金山。擾邊爲遼陽患。乞益兵以備。乃遣黃儔齎書諭訥哈出曰。前者萬戶黃儔回。聞將軍威震遼左。英資如是。足以保定一方。然旣往不復。君子當察。昔在趙宋。君主天下。立綱陳紀。黎庶莫安。逮至末年。權綱解紐。故元太祖興于朔方。世祖人統中國。此皆天道。非人力也。元之疆宇。非不廣。人民非不多。甲兵非不衆。城郭非不堅。及紅巾起于汝潁。羣盜徧于中原。僞名僭號者繼出。小明王稱帝于亳。徐真一

稱帝于蘄陳友諒稱帝于九江張士誠稱王於姑蘇明  
昇稱帝于西蜀彼四帝一王皆擁兵數萬割據中夏踰  
二十年朕本淮民爲羣雄所逼因集衆禦亂遂渡江與  
將軍會于太平比待他俘特加禮遇且知將軍爲名家  
故放北歸今又十七年矣朕見羣雄無成調兵四出北  
平中原南定閩越東取方氏西收巴蜀四帝一王皆爲  
俘虜惟元君奔北自亡華夷悉定天下大安此天命非  
人力也近聞將軍居金山大張威令吾兵亦守遼左與  
將軍旌旗相望將軍若能遣使通問貢獻姑容就彼順  
其水草猶可自逞一方不然胡無百年之運大厦旣傾  
非一木可支爨之後先惟將軍目思之儔至金山唵哈

出拘留不遣。

遣使命魏國公徐達自北平往山西操練士馬。

徐達駐師北平。以沙漠旣平。徙北平山後之民三萬五千八百戶。一十九萬七千二十七口。散處衛府。籍爲軍者給衣糧籍爲民者給田以耕。至是命往山西操練士馬。諭之曰。凡爲國者貴有備。有備則無患。古人當平康之時。克詰戎兵。內以安國家。外以制四夷。况山西地近胡虜。尤不可無備。故命卿帥諸將校繕脩城池。訓練士卒。如調遣征進。迤西等處。從便行之。其太原蔚朔大同東勝軍馬及新附韃靼官軍。悉聽節度。

定置遼東都指揮使司。以馬雲葉旺爲都指揮使。吳泉馮

祥爲同知王德爲僉事總轄遼東諸衛軍馬

上以劉益之變而元臣訥哈出等未附故命雲等鎮之  
仍遣雲諭祭劉益

庚申頴川侯傅友德克成都

友德兵圍成都戴壽向大亨等出戰以象載甲士列于  
陣前友德命前鋒以火器衝之象却走壽兵躡藉死者  
甚衆會湯和遣人報重慶之捷壽等亦得家書聞重慶  
已降而室家皆完乃籍府庫倉廩遣其子詣軍門納款  
友德許之翌日壽率其屬降友德按兵入自東門得士  
馬三萬分兵徇下川屬州縣之未附者崇慶知州尹善  
清拒戰擊敗斬之判官王桂葉遂率耆民詣軍中降

禮記元御史大夫福壽

先丙申歲王師下建康或勸福壽遜福壽曰我  
臣與城存亡竟死之上謂中書省臣曰朕渡江以來  
之守臣如御史大夫福壽仗義守職保障其民以身殉  
國雖無甲兵外援而能臨難不避可謂忠臣矣宜立祠  
令有司歲時致祭

謫國子祭酒魏觀爲龍南知縣司業朱濂爲安遠知縣  
濂上孔子廟堂議曰世之言禮者咸取法於孔子不以  
古之禮祀孔子褻祀也褻祀不敬不敬則無福奈何今  
之人與古異也古者王人西向几筵在西也漢章帝幸  
魯祠孔子帝西面再拜開元禮先聖東向先師南向三



獻官西向猶古意也。今襲開元二十七年之制。遷神南  
面。非神道尚右之義矣。古者木主棲神。天子諸侯廟皆  
有主。大夫束帛。士結茅爲最。無像設之事。開元禮設先  
聖神座於堂上。兩楹開先聖東北。皆莞席。尚掃地而祭  
也。今因開元八年之制。搏土而肖像焉。失神而明之之  
義矣。古者灌鬯炳蕭求神於陰陽也。今用熏蕕代之。非  
簡乎。古者朝覲會同。郊廟祭饗皆設庭燎。司烜共之火。  
師監之。示嚴敬也。今以秉炬當之。非實乎。又古之道有  
德者使教焉。死則以爲樂祖。祭於瞽宗。謂之先師。若漢  
祖有高堂生。樂有制民詩。有毛公。書有伏生也。又凡始  
立學者。必釋奠於先聖先師。釋奠必有合。謂國無先聖

先師則所釋奠者當與鄰國合。若唐虞有夔伯夷周有  
周公魯有孔子。則不合也。當是時學者各祭其先師。非  
其師弗學。非其學弗祭。學校旣廢天下莫知所師。孔子  
集群聖之大成。顏曾思孟實傳其道。尊之以爲先聖。先  
師而通祀於天下。固宜。若七十二子止於國學設之庶  
幾弗悖禮意。開元禮國學祀先聖孔子。以顏子等七十  
二賢配。諸州惟配顏子。今以荀況之言性惡楊雄之事  
王莽。王弼之宗莊老。賈逵之忽細行。杜預之建短喪。馬  
融之黨附勢家。亦廁其中。吾不知其何說也。古者立學  
專以明倫。子雖齊聖不先父食久矣。故禹不先鯀。湯不  
先契。文王不先不窋。宋祖帝乙。鄭祖厲王。猶尚祖也。今

回參伋坐饗堂上而其父列食於廡間顛倒拜倫莫此  
爲甚吾不知其何說也古者士見師以菜爲贄故始入  
學者必釋菜以禮其先師其學官時祭皆釋奠今專用  
國朝所制釋奠有樂無聲釋菜無樂是二釋之重輕以  
樂之有無也今襲用魏漢律所制大晟樂乃先儒所謂  
亂世之音可乎哉古者釋奠釋菜名義雖存而儀注皆  
不可考開元禮彷彿儀禮饋食篇節文爲詳所謂三獻  
獻後各飲福卽尸酢主人主婦及賓之義也今憚其煩  
唯初獻得行之可乎哉他如廟制之非宜冕服之無章  
器用祿乎雅俗升降昧乎左右此類甚多雖更僕不可  
盡若乃建安熊氏欲以伏羲爲道統之宗神農黃帝堯

湯文武次而列焉。畢陶伊尹太公周公暨稷契  
仲虺說箕子。皆天子公卿之師式。宜秩祀天子之學。  
孔子實兼祖述憲章之任。其爲通祀。則自天子下達。苟  
如其言。則道統益尊。三皇不汨於醫師。太公不辱於武  
夫矣。昔周立四代之學。學有先聖。虞庠以舜。夏學以禹。  
殷學以湯。東膠以文王。復各取當時左右四聖。成其德  
業者。爲之先師。以配享焉。此固天子立學之法也。上不  
喜。謫瀛安遠知縣祭酒魏觀。亦以考禮稽緩皆謫。

遣佛祿國故民掄古論持詔以卽皇帝位。號國大明。建元  
洪武。諭其國王○占城國王阿答阿者。遣使奉表來朝。  
表言安南侵其土境。乞賜兵器樂器。樂人。俾安南知占

城乃聲教所被輸貢之地不敢欺凌上命中書省移咨其國已令安南卽日罷兵爾國亦宜各保疆土所請兵器似助爾相攻非撫安之義樂器樂人語音有異難以發遣若爾國有習華語可教音律者選數人赴京習之并諭福建行省占城海舶貨物皆免其征以示懷柔之意

蜀明昇至京朝見授歸義侯賜居第于京師○淮安侯華雲龍統兵雲州擒故蒙古平章僧家奴而還○八月癸巳浮泥國王馬合謨遣使進表箋貢方物○己亥江夏侯周德興等克保寧

先是上遣使諭中山侯湯和等曰爲將貴審機而重料

敵古云雖有智慧不如乘勢。今全蜀已下。惟吳友仁尚據保寧。偷旦夕之命。乘機而取之。此破竹之勢。無不克者。將軍徘徊不進。何也。吾付將軍以大任。而臨事往往逗撓如此。何以總軍政寄國命乎。和等聞詔。始遣周德興會傅友德兵克其城。執吳友仁。械送京師。蜀地悉平。已酉。高州海寇羅子仁等作亂。通判王名善以被執不屈。死雷州衛。遣千戶黃青討平之。○九月庚戌朔。日有食之。○庚申三佛齊國王馬哈刺札八刺十遣使奉金表貢方物。○冬十月庚辰。令天下遇有災變。卽以實聞。

上謂省臣曰。祥瑞災異。皆上天垂象。然人之常情。聞禎祥則有驕心。聞災異則有懼心。朕嘗命天下勿奏祥瑞。

若災異卽時報聞尚慮臣庶罔體朕心遇災異或匿而不舉或舉不以實使朕失致謹天戒之意中書其諭天下遇有災變卽以實上聞○上嘗謂丞相汪廣洋曰朕觀前代人君多喜佞諛以飾虛名甚至臣下詐爲瑞應以恣矯誣至於天災垂戒厭聞于耳如宋真宗亦號賢君初相李沆日聞災異其心猶存警惕厥後澶淵旣盟大臣首啓天書以侈其心羣下曲意迎合苟圖媚悅致使言祥瑞者相繼於途獻芝草者三萬餘本朕思凡事惟在於誠況爲天下國家而可僞乎爾中書自今凡祥瑞不必奏如災異及蝗旱之事卽時報聞廣洋叩首曰陛下敬天勤民孰大於此非惟四海蒼生幸甚而天下

子被孫萬世之謨訓也。臣謹奉詔旨。○上嘗御奉天門。謂吏部尚書詹同曰。論行事於目前。不若鑒之於往古。卿儒者。宜知先古帝王爲治之道。試爲朕言之。同對曰。古先帝王之治。無過於唐虞三代。可以爲法也。上曰。三代而上。治本於心。三代而下。治由乎法。本於心者。道德仁義。其用爲無窮。由乎法者。權謀術數。其用蓋有時而窮。然爲治者。違乎道德仁義。必入于權謀術數。甚矣擇術不可不慎也。○上嘗與廷臣論刑法。御史中丞陳寧曰。法重則人不輕犯。吏察則下無遁情。上曰。不然。法重則刑濫。吏察則政苛。鉗制下民。而犯者必衆。鉤索下情。而巧僞必滋。夫壘石之岡。勢非不峻。而草木不茂。



金鐵之溪。水非不清。而魚鼈不生。古人立法置刑以防惡衞善。故唐虞畫衣冠。異章服。以爲戮。而民不犯。秦有鑿趾抽脅之刑。慘夷之誅。而囹圄成市。天下怨叛。所謂法正則民慤。罪當則民從。今施重刑。而又委之察吏。則民無措其手足矣。朕聞帝王平刑。緩獄。而天下服從。未聞用商韓之法。可致堯舜之治也。寧慚而退。

辛未諭省府臺臣謹備胡戎

上御奉天門。諭省府臺臣曰。海外蠻夷之國。有爲患於中國者。不可輒自興兵。古人有言。地廣非久安之計。民勞乃易亂之源。如隋煬帝妄興師旅。征討琉球。殺害夷人。焚其宮室。俘虜男女數千人。得其地。不足以供給。得

其民不足以使令。徒慕虛名。自敝中土。載諸史冊。爲後世譏。朕以諸蠻夷小國。阻山越海。僻在一隅。彼不爲中國患者。朕决不伐之。惟西北胡戎。世爲中國患。不可不謹備之耳。卿等當記所言。知朕此意。○上嘗觀大學衍義。至晁錯謂人情莫不欲壽。三王生之而不傷。真德秀釋之曰。人君不窮兵黷武。則能生之而不傷。顧謂侍臣曰。晁錯之言。其所該者廣。真氏之言。其所見者切。古人云。兵者凶器。聖人不得已而用之。朕每臨行陣。觀兩軍交戰。出沒於鋒鏑之下。呼吸之間。創殘已甚。心甚不忍。嘗思爲君恤民所重者。兵與刑耳。濫刑者陷人於無辜。黷兵者驅人於死地。有國者所當深戒也。○上嘗與侍

臣論孫子。或曰。武之書。自易以及難。其法先粗而後精。其言約而要。故叩之而不窮。求之而益隱。或曰。武之術。其高者在於用常而知變。若實在彼。則變而爲虛。虛在此。則變而爲實。機妙莫測。此用武之權衡。千古不可易也。或又曰。武之術。以詭道勝。至於終篇而用間曰。計以情而生。情以間而得。苟遇不可間之君。無可乘之隙。將何以得其情哉。人各持其說。上曰。以朕觀之。武之書。雜出於古之權書。特未純耳。其曰不仁之至。非聖之主。此說極是。若虛實變詐之說。則淺矣。苟君如湯武。用兵行師。不待虛實變詐。而自無不勝。虛實變詐之所以取勝者。特一時詭遇之術。非王者之師也。然則術終亦窮。

耳。蓋用仁者無敵。恃術者必亡。觀武之言。與其術亦有相侔。武之書必有所受。而武之術則不能盡如其書也。癸巳日本國王良懷遣其臣僧祖來進表箋貢方物。

先是遣趙秩等往日本國宣諭。秩泛海至析木崖。入其境。關者拒勿納。秩以書達其王。王乃延秩入。秩諭以中國威德。而詔旨有責讓其不臣中國語。王曰。吾國雖夷狄。僻在扶桑。未嘗不慕中國之化。而通貢奉。惟蒙古以戎狄泄華夏。而以小國視我。我先王曰。我夷彼亦夷也。乃欲臣妾我。而使其使趙姓者。誅我以好語。初不知其覘國也。既而使者所領水犀數十艘。已環列於海崖。賴天地之靈。一時雷霆風波。漂覆幾無遺類。自是不與通。

者數十年。今新天子帝華夏。天使亦姓趙。豈昔蒙古使者之雲仍乎。亦將誅以好語而襲我也。命左右將刃之。秩不爲動。徐曰。今聖天子神聖。文武明燭八表。生于華夏而帝華夏。非蒙古比。我爲使者。非蒙古使者。後爾若悖逆不吾信。卽先殺我。則爾之禍亦不旋踵矣。我朝之兵。天兵也。無不一當百。我朝之戰艦。雖蒙古戈船百不當其一。况天命所在。人孰能違。豈以我朝之以禮懷爾者。與蒙古之襲爾國者比耶。於是其王氣沮。下堂延秩。禮遇有加。至是奉表箋稱臣。遣祖來隨秩入貢。詔賜祖來等文綺帛。仍賜良懷大統曆及文綺紗羅。

諭指揮郭英等保身與家之道

上御武樓指揮郭英等侍。上謂英等曰。朕嘗思保天下。汝等能思保身家乎。英曰。臣性至愚。亦嘗念及此。上曰。朕命軍士往臨濠造宮殿。汝等又役之爲私室。是保身家之道與。英等駭愕請罪。上曰。朕每思所以保汝輩之道。汝輩乃不思保其身。誠愚也。昔朕皇考嘗言。凡人守分植財。如置田穫稻。歲有常入。用之無窮。若悖理得財。如貪官污吏獲利。雖博有喪身亡命之憂。今汝等有勲勞於國。朕旣酬以爵祿。是卽恒業。能守而勿失。子孫永賴。不然將無後憂乎。英等頓首謝曰。陛下訓飭臣等切至。銘刻不敢忘也。

召龍南知縣魏觀。安遠知縣朱濂。以爲禮部主事。○命官

吏犯贓罪者無貸

初元末政弊。仕進者各賂遺權要。邀買名爵。下至州縣簿書小吏。非財賂亦無得而進。及至臨事。輒蠹政。害獄大爲民害。上深知其弊。嘗曰。此弊不革。欲成善治。終不可得。故有是令。

詔靖海侯吳禎籍方國瑯所部溫台慶元三府軍士及蘭秀山無田糧之民。嘗充船戶者。隸各衛爲軍。

凡十一萬一千七百三十人。

征西將軍中山侯湯和。征虜前將軍潁川侯傅友德等還京。論功行賞。

詔潁川侯傅友德統大軍。冒越險阻。首克階文。破綿漢。

成都克保寧諸郡。德慶侯廖永忠破瞿塘。下重慶。敘明  
昇出降。二人功最大。各賞白金二百五十兩。綵段二十  
表裏。濟寧侯顧時。臨江侯陳德等。都督僉事何文輝。金  
朝興等。及各指揮千百戶。鎮撫總小旗軍士。各賞有差。  
惟營陽侯楊璟。南雄侯趙庸。永嘉侯朱亮祖。不與賞。上  
諭璟等曰。爾三人不賞。亦能自知其過乎。楊璟粗識文  
字。命爾統軍。屢嘗失利。兵法云。知己知彼。百戰百勝。添  
竈減竈。人莫我知。爾乃輕信敵人詭計。輒使黃永謙往  
彼。使知我虛實。雖錡釜之數。亦盡知之。爾嘗從克保寧。  
當有微賞。然爾先於潞州失陷軍馬。及攻覃屋寨。久不  
能克。進攻瞿塘。又致覆敗。較之破保寧之功。不足以掩



過趙庸從克李逢春寨及下保寧亦有微勞然中山侯調遣率兵取桑植容美洞會江夏侯合攻覃屋寨至中道而還向非曹良臣老於行陣功何由成今不汝罪恩亦至矣朱亮祖比至重慶而城已下雖有跋涉之勞而擅杖殺軍校罪浮于功賞何可得爾等宜益自脩省奮志勉力以圖後功璟等皆頓首謝明日上復諭中山侯湯和曰朕前者命爾統師伐蜀爾乃駐兵歸州逗遛不進非潁川侯越關渡險直入劔閣致戴壽撤瞿塘之兵還援漢州德慶侯因得乘虛攻破瞿塘則西蜀何由可下後攻保寧又不勇往爾朕舊人自濠梁相從軍功不細宜爵爾爲公緣功過不相掩封爾爲第一侯爵今又

不能自奮。而使將得上功。朕甚爲爾惜。朕之論功。行賞。如衡鑑之於物。無少差爽。必合於大公至正之道。雖欲爾私。不可得也。和叩頭謝曰。陛下屬臣以大任。而臣愚劣。失機緩事。死有餘責。陛下天地之量。宥而不誅。臣已過望。况敢希重賞乎。

逮漢中知府費震至京。詔釋之。

初震在漢中。多善政。值大軍平蜀之後。陝西旱饑。漢中尤甚。鄉民多聚爲盜。莫能禁戢。是時府倉儲糧十餘萬石。震卽日發倉令民受粟。具以狀奏聞。自是攘竊之盜與隣境之人來歸者。令爲保伍。驗丁給之。賴以全活者甚衆。至秋大熟。民悉以粟還倉。上聞而嘉之。至是以他

事被逮上曰震良吏也釋之以爲牧民者勸震初爲吉水州知州亦以寬惠愛民有善政後累官至戶部尚書詔定官民揖拜禮

上以軍民行禮尚循胡俗飲宴行酒多以跪拜爲禮乃命省臣及禮部官定爲儀式申禁之

壬子洪武五年春正月壬子置親王護衛指揮使司○瑄望國王卜納的遣使奉金葉表貢方物并繪其土地山川以獻

上謂中書省臣曰西洋瑄里世稱遠番涉海而來難計年月其朝貢無論疏數厚往而薄來可也於是賜卜納的。大統曆及金織文綺紗羅使臣幹的赤刺丹八兒山

綺紗羅有差。

翰林待制王禕齋詔諭雲南

詔曰朕惟天生斯民必立之君以撫治之曩者元君失政海內鼎沸疆宇爪分其盜據境土擅生殺者不可勝數生民塗炭十有七年朕起布衣提義師開基江左命將四征西平陳友諒東縛張士誠南下閩粵北靖幽燕奠安華夏復我中國舊疆遂爲臣民推戴卽皇帝位定有天下之號曰大明建元洪武是用遣使外夷播告朕意使者所至蠻夷酋長莫不稱臣入貢惟爾梁王把都平章段光都元帥段勝守鎮雲南亦嘗遣人告諭不意蜀戴壽等憑恃險隘拒絕中道致使朕意不達爾土去

年遂興問罪之師。分命大將軍率馬步舟師水陸並進。直抵重慶。明昇面縛。啣壁出降。繼平成都。生擒戴壽。卽其郡邑設置官守。西土旣寧。復遣使往諭爾等。尚恐未達。今因北平送至蘇成。稱爲爾等北使之入。故復遣齎詔往諭。朕雖不德。不及我中國古先聖王。使四夷懷服。然不可不使天下周知。故茲詔諭。爾其悉之。禕至雲南。梁王久留不遣。

甲子遣使楊載以建國大明建元洪武諭琉球知之。○賜魏國公徐達曹國公李文忠宋國公馮勝交趾弓五十彤弓百。

上謂之曰。古者諸侯有四夷之功。則賜之弓矢。卿等宜

力四方。故有此賜。達等謝何以當。上曰。古人有言。善有  
章。雖賤賞也。惡有黜。雖貴罰也。卿等開國之臣。其章大  
矣。故賜以此。不爲過也。

徙歸德侯陳理。歸義侯明昇于高麗。

陳理明昇居常鬱鬱不樂。頗出怨言。上聞之曰。此童孺  
輩言語小過。不足問。但恐爲小人壘惑。不能保其始終。  
宜處之遠方。則黨隙無自至。可始終保全矣。於是徙之  
高麗。遣元樞密使延安荅理護送而往。仍賜高麗王紗  
羅文綺。俾善待之。

詔犯罪當誡兩廣充軍者。俱發臨濠屯田。○命靖海侯吳  
順率舟師運糧遼東。以給軍餉。○命禁下第舉人不許撫

拾主司

上謂禮部臣曰近代舉人不中程式多不省已自脩以圖後進往往撫拾主司細故謗毀以逞私忿禮讓廉耻之風不立今後有此者罪之

遣魏國公徐達曹國公李文忠宋國公馮勝分道征王保保

上御武樓與諸將臣籌邊事中書左丞相魏國公徐達曰今天下大定民庶已安北虜歸附者相繼惟王保保出沒邊境今復遷居和林臣願鼓率將士以勦絕之上曰彼朔漠一窮寇耳終當絕滅但今敗亡人衆遠處絕漠以死自衛困獸猶鬪况窮寇乎姑置之諸將曰王

保保狡猾狙詐。使其在終必爲寇。不如取之。永清沙漠。  
上曰。卿必欲征之。須兵幾何。達曰。得兵十萬足矣。  
上曰。兵須十五萬。分三道以進。於是命達爲征虜大將。  
軍出中路。曹國公李文忠爲左副將軍。出東路。宋國公  
馮勝爲征西將軍。出西路。上戒曰。卿等力請北伐。志  
氣甚銳。然古人有言。臨事而懼。好謀而成。今兵出三道。  
大將軍由中路。出鴈門。揚言趨和林。而實遲重。致其來  
擊之。必可破也。左副將軍由東路。自居庸出應昌。以掩  
其不備。必有所獲。征西將軍由西路。出金蘭。取甘肅。以  
款其兵。令虜不知所爲。乃善計也。卿等宜益思戒慎。不  
可輕敵。達等遂受命而行。



命衛國公鄧愈江夏侯周德興江陰侯吳良分道討古州  
田州澧州等處洞蠻

鄧愈兵至澧州遣楊璟討散毛柿溪赤溪安福等三十  
九洞平之吳良攻五開銅鼓潭溪古州諸蠻誅其首惡  
撫其餘黨凡平二百二十三洞籍其民一萬五千收集  
逃散士卒四千五百四十人周德興等討婪鳳安田等  
州諸洞蠻悉平之各班師還京

二月己卯諭羣臣各盡其職

上諭羣臣曰凡居官者任之大小雖不同要皆盡其職  
而已昔范文正公居位凡日之所爲必求與食相稱或  
有不及明日必補之其心始安賢人君子於國家盡心

如此朝廷豈有廢事。天下安得不治。元之將亡。內外諸官皆安於苟且。不脩職事。惟日食肥甘。因循度日。凡生民疾苦。政事得失。略不究心。由是紀綱廢弛。民心日離。遂致土崩。此皆近事。可爲明鑑。朕每夜不安寢。未明視朝。常恐天下之事。或有廢怠不舉。民受其弊。卿等當體朕懷。夙夜盡心。能脩厥職。則無負國家。異日垂名青史。豈不美乎。

丙戌安南陳叔明遣使朝貢却之

陳叔明遣其臣阮汝霖來朝。奉表貢馴象。禮部已受其表。將入見。主事曾魯取其副視之。曰。前王乃陳日燧。今表曰叔明。必有故也。亟白尚書詰之。蓋叔明逼死日燧。

而奪其位懼朝廷致伐故托脩貢以規意汝霖不敢聽其言之上曰島夷何役猾如是却其貢不受

### 定四川茶鹽之制

戶部言四川產巴茶凡四百七十七處茶二百三十八萬六千九百四十三株茶戶三百一十五宜依定制每茶十株官取其一徵茶銀兩無戶茶園令釋種以十分爲率官取其人歲計得茶一萬九千二百八十斤令有司貯候西番易馬從之○戶部言四川鹽井計一千四百五十六處已開煎三百八十處其未開者一千七百七處遂命會計各郡邑軍民歲食及鹽馬司市馬歲額之數前辦餘井並塞之○四川茶鹽都轉運司言碶阻

永寧筠連諸處所產之茶各剪刀粗葉惟西番夷僦用之。自昔商販未嘗出境既非茶馬司巴茶之比宜別立茶局徵其稅易紅纓袍衫朱布椒蠟可資國用其居民所收之茶亦宜依江南茶法於所在官司給引販賣公私便之。今擬設永寧茶局一曰界首鎮歲收茶一十八萬八千斤雅州茶局一曰碶門歲收茶四十一萬一千六百斤成都茶局三曰灌州歲收茶七千四百三十斤曰安州歲收茶一萬三千一百七十斤曰筠連州歲收茶二十九萬六千二百八十斤既收則徵其什一於官詔從之

高麗國王王頴請遣子弟入太學

其詞曰秉彝好德無古今愚智之殊用夏變夷在禮樂詩書之習故我東夷之人自昔以來皆遣子弟入太學不惟知君臣父子之倫亦且仰聲明文物之盛伏望皇上察臣向化之誠使互鄉之童得齒庠序之胄不勝慶幸。上顧謂中書省臣曰高麗欲遣子弟入學此亦美事但其涉海遠來離其父母未免彼此懷思爾中書宜令其國王與羣下熟議之爲父兄者果願遣子弟入學爲子弟者果聽父兄之命無所勉強卽遣使護送至京或居一年或半年聽其歸省也

三月命禮部重定官民相見禮

先是元俗官僚相見輒跪一足以爲禮拜刺以叩頭爲

致敬既拜復跪一足屬官下人見上司官長與爲禮卽引手於後退却若避之然上甚厭之自卽位初卽加禁止然舊習不能盡革至是復定爲儀節令頒示之上謂禮部臣曰禮者所以美教化而定民志成周設大司徒以五禮防萬民之僞而教之中夫制中莫如禮脩政莫如禮故有禮則治無禮則亂居家有禮則長幼序而宗族和朝廷有禮則尊卑定而等威辨元以夷變夏民染其俗先王之治幾乎息矣而人情狃於淺近未能卒變今命爾稽考典禮合於古而宜於今者以頒布天下俾習以成化庶幾復古之治也

以禮部主事魏觀爲蘇州知府○都督藍玉遇王保保於

土刺河擊敗走之。○夏四月宣化盜起劫南寧府詔發廣西官軍討平之。

初南寧指揮僉事左君弼覈民之無籍者爲軍。又縱所部軍士入山伐木。民多驚擾遂相構爲盜。至是討平之。斬首百餘級。生擒二千八百餘人。獲馬五十疋。仍命大都督府按罪君弼而禁戢其卒。

詔天下舉行鄉飲酒禮。

上以海內宴安思化民復古。乃詔禮部取儀禮及唐宋之制。周官讀法之旨。參定鄉飲禮儀頒行之。

大將軍徐達及虜兵戰于嶺北敗績。○中書右丞王溥以建言物異來言斥之。

王溥遣人來言近督工取材木建昌蛇舌巖衆兒巖上有衣黃衣者歌曰龍蟠虎踞勢岩巖赤帝重興勝六朝八百年終王氣復重華從此繼唐堯其聲如鐘歌已忽不見上曰明理者非物怪可惑守正者非讖諱可干漢之文成五利足以爲戒事涉妖妄豈可信耶

天旱命宮中蔬食遂大雨

夏至祭地祇於方丘禮畢還宮皇后妃嬪見上曰方農時天久不雨秧禾尚未入土朕恐民之失望也甚憂之汝等宜皆蔬食自今日始俟雨澤降復常膳如故於是宮中自后妃而下皆蔬食是夜大雨詰旦水深尺餘皇后具冠服賀且曰妾事陛下二年每見愛民之心拳拳



於念慮之間。今茲大旱。陛下誠言所孚。天心感格。遂致  
雨澤之應。民得足食。妾敢進賀。上曰。人君所以養民也。  
民與君同一體。民食有缺。吾心何安。幸上天垂念。獲茲  
甘雨。吾何德以堪。皇后能同心憂勤。天下國家所賴也。  
六月定宦官禁令。○命禮部議宮儀女職之制。

禮部具陳周制。後宮設內官以贊內治。漢制設內官二  
十四等。凡數百人。唐制設六局二十四官。凡一百九十  
人。女使五十餘人。皆選良家子女充之。上以爲古者所  
設過多。宜防女寵。垂法將來。乃命重加裁定。遂定設六  
局一司。局曰尚官。曰尚儀。曰尚服。曰尚食。曰尚寢。曰尚  
功。司曰宮正。尚寶局。則總行六尚之事。尚官局掌導引。

中官總司紀司言司簿司閤之事。尚儀局掌禮儀起居。總司籍司樂司賓司贊之事。尚服局掌宮內服用。總司寶司衣司仗司飾之事。尚食局掌供內膳。總司饌司醢司藥司供之事。尚寢局掌燕寢。總司設司輿司苑司燈之事。尚功局掌督女工。總司製司環司綵司計之事。官正司掌戒令責罰之事。凡官七十五人。女使十八人。比古減一百四十人。

戊寅征西將軍馮勝左副將軍傅友德師至甘肅故蒙古將上都驢降。

初勝等師次蘭州友德先率驍騎五千直趨西涼遇元失刺罕之兵戰敗之至永昌又敗元太尉朶兒只巴于

忽刺罕口。大獲其輜重馬牛。進至掃林山。勝等師亦至。共擊走胡兵。友德手射死其平章不花。追斬其黨四百餘人。降太尉鎖納兒加。平章管著等。至是上都驢知大軍至。率所部吏民八百三十餘戶迎降。勝等撫輯其民。留官軍守之。遂進至亦集乃路。守將卜顏帖木兒全城降。師次別駕山口。元岐王朶兒只班遁去。追獲其平章長加奴等二十七人。及馬駝牛羊十餘萬。友德復引兵至瓜沙州。又敗其兵。獲金銀印馬駝牛羊二萬而還。

癸巳定六部職掌

吏部掌天下官吏選法封勲考課之政。其屬有三。一曰總部。掌文選。二曰司勲部。掌官制。三曰考功部。掌考覈。

戶部掌天下戶口田土貢賦經費錢課之政其屬有四  
一曰總部掌天下戶口田土貢賦水旱災傷二曰度支  
部掌考校賞賜祿秩三曰金部掌課程市舶庫藏錢帛  
茶鹽四曰倉部掌漕運軍儲出納料量禮部掌天下禮  
儀祠祭燕享貢舉之政其屬有四一曰總部掌祠祭醫  
藥喪葬僧道度牒二曰膳部掌燕享四曰主客部掌貢  
獻建言四夷朝貢賞賚兵部掌天下武選廐驛甲仗之  
政其屬有三一曰總部掌軍務符驗巡檢二曰職方部  
掌城池郵置烽堠四夷歸化三曰駕部掌鹵簿馬政車  
輅驛傳兵器刑部掌天下刑法及徒隸勾覆開禁之政  
其屬有四一曰總部掌律令獄具盜賊鬪毆稱寃二曰

都官部掌徒流戒諭審決。三曰比部掌贓罰凡犯錢糧戶婚田土茶鹽之法者。四曰司門部掌門禁軍政關渡捕亡詐僞略誘。工部掌天下百工屯田山澤之政其屬有四。一曰總部掌城垣工匠。二曰虞部掌捕獵窰冶爐冶軍需造紙鼓鑄。三曰水部掌水利水害壩閘橋梁舟車。四曰屯田部掌屯田墾田圩岸廨舍竹木薪炭各部設郎中員外郎主事分掌其事而以尚書侍郎總其政務。

左副將軍李文忠及虜兵戰于阿魯渾河大破走之。

文忠率都督何文輝等兵至口溫之地虜聞之夜棄營遁獲其牛馬輜重無筭遂進至哈刺莽來虜部落驚潰。

復進至臚胸河文忠諭將士曰兵貴神速宜乘勝追之  
千里襲人難以重負於是留部將韓政等守輜重命士  
卒人持二十日糧兼程而進至土刺河虜將蠻子哈刺  
章覘知之悉騎渡河設陣以待文忠督兵以戰戰數合  
虜稍却復進至阿魯渾河虜兵益衆搏戰不已文忠馬  
中流矢急下馬持短兵接戰從者劉義直前奮擊以身  
蔽文忠指揮李榮見事急以所乘馬授文忠自奪虜騎  
乘之文忠策馬橫槊麾衆更進於是士卒鼓勇皆殊死  
戰虜遂敗走獲人馬以萬計追至青海虜兵又集文忠  
勒兵據險椎牛享士縱所獲馬畜于野示以閑暇居三  
日虜疑有伏不敢逼乃遁去文忠亦引還夜行失故道

至桑歌兒麻士卒無水渴甚文忠默禱於天忽所乘馬  
跑地長鳴泉水湧出人皆以爲天助云是役也宣寧侯  
曹良臣驍騎左衛指揮使周顯振武指揮同知常榮神  
策衛指揮使張耀俱戰歿

句容縣民獻嘉瓜二同蒂而生

上御武樓中書省率百官進禮部尚書陶凱奏曰陛下  
臨御同蒂之瓜產於句容句容陛下祖鄉實爲禎祥蓋  
由聖德和休國家協慶故雙瓜連蒂之瑞獨見如此以  
彰陛下保民愛物之仁非偶然者上曰草木之瑞如嘉  
禾並蓮合歡連理兩岐之麥同蒂之瓜皆是也卿等以  
此歸德於朕朕否德不敢當縱使朕有德天必不欺

物之禎祥示之。苟有微過。必垂象以譴告。使我克謹其身。保民不至於禍殃。且草木之祥。生於其土。亦惟其土之人應之。於朕何禎。若盡天地間時和歲豐。乃王者之禎。故禎祥不在於微物。遂爲贊。賜其民錢千二百。

作鐵榜申誡公侯

詞曰。朕起布衣。賴股肱宣力。平定天下。旣已論功行賞。封爲公侯。錫以鐵券。頒以重祿。令傳子孫。共享太平。尚慮公侯之家。奴僕人等。習染頑風。冒犯國典。今以鐵榜申明律令。朕諭卿等。除親屬別議外。凡奴僕一犯。卽用究治。於爾家無所問。敢有恃功藏匿。犯人者。比同一死。斬罪。爾等各宜謹守其身。嚴訓于家。以稱朕始終保全。



之意其目有九。一凡內外各指揮千百戶鎮撫并總小旗不得私受公侯金帛衣服錢物。二凡公卿等官非奉特旨不得私役官軍。三凡公侯之家不得強占官民山場河泊茶園蘆場及金銀銅錫鐵冶。四凡內外各衛官軍非當出征之時不得輒於公侯門首侍立聽候。五凡公侯之家管庄人等不得倚勢在鄉欺毆人民違者刺面。六凡公侯家產籍沒入官聽使之人皆發南寧充軍。六凡公侯之家屯田佃戶管庄幹辦人者奴僕及其親屬人等倚勢凌民侵奪官產財物並依倚勢欺毆人民處斷。七凡公侯之家除賜定儀仗戶及佃田人戶已有名額報籍在官敢有私托門下影蔽差徭者斬。八凡公侯之

家不許倚恃權豪欺壓良善。虛錢實契侵奪人田地房屋墾畜。凡凡公侯之家不得受諸人田土及朦朧投獻物業。

命工部造紅牌鐫戒諭后妃之辭懸於宮中。○秋七月中山侯湯和及虜兵戰于斷頭山敗績。平陽左衛指揮同知章存道死之。○高麗王顥請發兵討耽羅國。賜璽書止之。高麗王遣其尚書吳季南于溫奉表貢馬及方物。言耽羅國恃其險遠不奉朝貢。及多有蒙古人留居其國。宜徙之簡秀山。逋逃所聚恐爲寇患。乞發兵討之。上賜璽書曰。耽羅居海之東。密邇高麗。朕卽位之初遣使止逋王國。未達耽羅。且耽羅已屬高麗。其中生殺王已專。

之。雖有胡人部落已聽命於高麗。又別無相誘之國。何疑忌之深也。因小隙而構成大禍。智士之所慎也。王宜熟慮烹鮮之道。不但靖安王之境土而耽羅亦蒙其德矣。

禮部奏擬凡遇親祀皇太子留宮中居守一體齋戒請著爲令從之。○八月貴州宣慰使靛翠請討部落隴居不許。靛翠上言。部落有隴居者。連結犵狁。負險阻兵。以拒官府。乞討除之。上以隴居反側不從命。由於靛翠所激。謂大都督府臣曰。蠻夷多詐。不足信也。中國之兵豈外夷報怨之具耶。宜遣使諭蠻中守將。慎守邊境。靛翠所請不從。將啓邊釁。宜預防之。

太原府徐溝縣西北空中有聲如雷地震自癸未至乙酉日○河南民獻白免命放之野○九月靖海侯吳禎遣人送故蒙古平章高家奴等至京

吳禎自遼東遣人送故元平章高家奴知樞密院高大方同僉古希古張海馬遼陽路總管高斌等至京上謂羣臣曰昔元都旣平有勸朕卽取遼陽者朕謂力不施於所緩威不加於所畏遼地雖遠不必用兵天下平定彼當自歸已而元遼陽行省平章劉益果以其地來降尚有一二桀驁徘徊顧望朕亦不問今高家奴等又相繼而至不勞寸兵坐底平定朕思彼皆故元之臣天運已革故來納款然自古興亡之道與治亂相尋書云與

治同道罔不興與亂同事罔不亡。元末君臣荒怠紀綱廢墜造亂之徒相煽而起。一旦天命弗保。此輩遂爲朕臣僕。向使其君臣知天命可畏。兢兢業業。夙夜罔懈。何至淪喪。卿等宜監前軌。小心慎德。以匡朕不逮。凡朕有爲。勿以事小不言。使朕忽於所警也。羣臣皆頓首曰。陛下敬天勤民。聖德日新。而拳拳不忘警戒。誠宗社萬世之福。

詔中書省聖壽節千秋節俱免慶賀

聖壽節前一日。中書右丞相汪廣洋率百官請行慶賀禮。上曰。朕已令罷此禮。卿等其體朕懷。勿賀。時高麗國王王顥遣同知密直司事成揆進表稱賀。并遣版圖判

書林完賀皇太子千秋節貢金銀龍龜貝玳瑁之屬  
詔中書諭其王繼今聖壽節千秋節俱免慶賀禮自是  
每歲聖節之日齊居素食不受朝賀

詔自今禱犯死罪可矜者免死發臨濠輪作

以時營中勸恐力役妨農

也○詔中書省自今驛傳馬夫必以糧富丁多者充之有  
司務加存恤

以驛傳繁重有以夫馬破家者

○冬十月甲午遣使諭高麗

王顥

先是上以高麗貢獻使者往來煩數遣故元樞密使  
延安荅里使高麗諭意且以紗羅文綺賜其王顥至是  
顥遣其門下贊成事姜仁裕上表謝恩貢馬十七匹并  
錦囊弓矢金鞍及人參等物是時其國賀正旦使金涪

等先至京師。上以正旦期尚遠恐久淹其使因仁裕繼至遂皆命還國。因謂中書省臣曰曩因高麗貢獻煩數故遣延安峇里往諭此意今一歲之間貢獻數至既困弊其民而使涉海道路艱險如洪師範歸國蹈覆溺之患幸有得免者能歸言其故不然豈不致疑夫古者諸侯之於天子比年一小聘三年一大聘若九州之外番邦遠國則惟世見而已其所貢獻亦無過侈之物今高麗去中國稍近人知經史文物禮樂略似中國非他邦之比宜令尊三年一聘之禮或比年一來所貢方物止以所產之布十足足矣毋令過多中書其以朕意諭之占城安南西洋瑣里瓜哇嘑尼三佛齊暹羅解真等

等國新附遠邦。凡來朝者。亦明告以朕意。中書因使者  
二旨咨諭其王。

詔蠲應天太平鎮江寧國廣德五府秋糧

詔曰朕乘群雄鼎沸之時。率將渡江。定都建業。十有八  
年。其間高城壘深濠。塹軍需造作。凡百供給。皆爾近京  
五府之民。率先效力。濟我時艱。朕念不忘。天下一統。今  
五年矣。雖嘗蠲其四歲租稅。然猶未足以報前勞。是用  
申飭有司。應天太平鎮江寧國廣德五府。今年合徵秋  
糧。盡行蠲免。

靖海侯吳禎還京

先是禎督餉定遼。因完城練卒。盡收遼東未附之地。至



是還上曰海外之地悉歸版圖固有可喜亦有可懼禎  
曰陛下威德加於四海夫復何憂上曰自古人君之得  
天下不在地之大小而在德之脩否元之天下地非不  
廣及末荒淫國祚遂滅由此觀之可不懼乎禎對曰聖  
慮深遠臣愚不及

命賞征甘肅京衛軍士

軍士一萬四百三十五人賞白金四萬四千兩時公侯  
都督指揮千百戶以匿所獲馬騾牛羊不賞上諭之曰  
爲將不私其身況於物乎昔祭遵爲將憂國奉公曹彬  
平南唐所載惟圖書汝等能法古人則令名無窮今之  
不賞汝等當省躬以思補過諸將皆叩頭謝罪而退

十一月詔以塞上苦寒命大將軍徐達左副將軍李文忠等回京士卒還駐山西北平。○十二月甲戌令有司考課必書農桑學校之績。○庚辰禮部尚書陶凱請編類欽錄簡爲書從之。

禮部尚書陶凱言漢唐宋皆有會要紀載時政以資稽考今起居注紀言紀事藏之金匱是爲實錄凡諸欽錄聖旨及奏事簿籍紀載時政可以垂法後世者宜依會要編類爲書使後之議事者有所考焉其臺省府宜各置銅匱藏欽錄簿以備稽考俱從之。

壬辰禮部侍郎曾魯致仕卒

上嘗謂禮部侍郎曾魯曰朕求古帝王之治莫盛於堯

舜然觀其授受其要在允執厥中。後之儒者講之非不精及見諸行事往往背馳。曾曰堯舜以此道宰制萬事如執權衡物之輕重長短自不能違而皆得其當此所以致雍熙之治也。後世鮮能此道於處事之際欲求其一一至當難矣。上曰人君一心治化之本存於中者無堯舜之心而欲施於政者有堯舜之治不可得也。曾又曰堯舜之道載之典謨者無以加矣。至於脩身理人本末次第具在大學一書。上曰大學平治天下之本豈可舍此而他求哉。

復以禮部主事宋濂爲太子贊善大夫。○遣使書諭故蒙古幼主及其臣劉仲德生彥德。

書曰朕觀前代獲亡國子孫必獻俘廟社誇示中國其有陽示優待者不久非鴟卽殺君家待宋幼主至削髮爲僧終不免於一死朕則不然君之子至京今已三年優待有加君宜遣使取歸朕本布衣生長君朝混於民間豈有志於今日自辛卯盜起汝潁斷黃間君家天運已去人心已離四海土崩民罹荼毒朕始議興師保身救民一時僭稱名號者盡爲俘虜君之父子亦不守宗社北遁沙漠此天運非人力也故特致書以達朕意君宜察焉○又與元臣劉仲德朱彥德二生書曰朕觀二生乃間氣所鍾古今如二生者絕少何也至正之君蒙塵而崩幼主孤弱大臣無不叛去獨二生竭力守護誠

可嘉尚今特遣使者諭爾君令取其子買的里八剌歸  
二生宜察之毋教人絕父子之倫爾君之宗祀不絕二  
生之家族亦可長保如其不然中國六軍出討旌旗數  
百里綿亘於陰山二生若忠於君身膏草野名垂千載  
亦奇男子事也或不能徇國偷生苟免將何面目與朕  
相見惟熟慮之

庚子詔造獨轅車

魏國公徐達督山西河南造八百輛曹國公李文忠督  
北平山東造一千輛

癸丑六年春正月德慶侯廖永忠請令廣洋江陰橫海水  
軍四衛造多櫓快船備倭從之

永思上言曰臣聞禦寇莫先於振威武威武莫先於利器用今陛下神聖文武定四海之亂君王萬國臣庶安樂臻於太平而北虜遺孽遠遁萬里之外獨東南倭夷負其禽獸之性時出剽竊以擾瀕海之民陛下命造海舟剪捕此寇以奠生民德至盛也然臣竊觀倭夷窺伏海島因風之便以肆侵掠其來若奔狼其去若驚鳥來或莫知去不易捕臣請令廣洋江陰橫海水軍四衛添造多櫓快船命將領之無事則沿海巡徼以備不虞若倭夷之來則大船薄之快船逐之彼欲爲寇不可得也上善其言從之

諭來朝守令

守令來朝。命賜酒食。明日陞辭。復諭之曰。慈祥愷悌。身之德也。刻薄殘酷。德之賊也。君子成其德而去其賊。故惠及於人。小人縱其賊而悖其德。故殃流於衆。且人莫不有是德。君子守之不失。故天理恒昭融于中。小人舍而不爲。故私欲恒蔽固於內。朕之任官。所用惟賢。舉廉興孝。惟欲厚俗。崇德勸善。惟欲成風。若僞爲慈祥。必無仁愛之實。僞爲愷悌。必無樂易之誠。爾等宜勉脩厥德。廣施惠政。以副朕懷。

壬子。命魏國公徐達。曹國公李文忠等往山西。北平。練兵防邊。上諭曰。處太平之世。不可忘戰。畧荒裔之地。不如守邊。朕同卿等起布衣。削羣雄。定禍亂。統一中夏。勤勞累歲。

至此無事。可以少休。然念向者創業之勤。及思古人居  
安慮危之戒。終不敢自寧。山西北平。與胡虜相接。大羊  
之羣。變詐百出。倉卒有警。邊地卽不寧矣。卿等豈能獨  
安。今無事之時。正宜往彼練習軍士。脩葺城池。嚴爲守  
備。使邊境永安。百姓樂業。朝廷無西北之憂。卿等亦可  
忘懷高枕矣。達等頓首曰。陛下宵旰憂勤。不忘武備。所  
謂國家有道。守在四夷。臣等敢不恭命。上復戒曰。禦邊  
之道。固當示以威武。尤必守以持重。來則禦之。去則勿  
追。斯爲上策。若專務窮兵。朕所不取。卿等慎之。

黜中書右丞相汪廣洋爲廣東行省叅政

以其異柔怠政也

○置

西寧衛以朵兒只失結爲指揮僉事○論聲色之害諭儒



臣詹同

上謂儒臣詹同曰。聲色乃伐性斧斤。朕觀前代人君。以此敗亡不少。蓋爲君居天下之尊。享四海之富。靡曼之色。窈窕之聲。何求不得。苟不知遠之。則小人乘間納其淫邪。不爲迷惑者幾人。况創業垂統之君。爲子孫之所承式。尤不可以不謹。同對曰。不邇聲色。成湯所以垂裕後昆。陛下此言。乃端本澄源之道。誠萬世子孫之法也。安南陳叔明遣使奉表謝罪。及貢方物。請封爵。

使臣譚應昂。與陳前王日煃因病而歿。叔明遂避于外。爲國人所立。上曰。日煃旣病卒。國人當爲之服。叔明且以前王印視事。俟能保安疆境。撫輯人民。然後定議賜

應昂等紗羅夏布違還

免江西沮壞鹽法商民死罪輸作臨濠

江西行省商民坐沮壞鹽法刑官擬以亂法罪當死。上曰：愚民無知犯法，猶赤子無知入井，見者莫不怵惕，豈宜更以死罪論之？法司執奏不已。上曰：有罪而殺國之常典，然有可以殺可以無殺，彼愚民沮壞鹽法，原其情不過爲貪利耳。初無他心，乃悉免死，輸作臨濠。

二月戊子，改羣牧監爲太僕寺，秩如舊。始定養馬法。

以監令唐元亨爲太僕寺卿，監丞孫模爲少卿。命應天廬州鎮江鳳陽等府滁和等州民養江北以便水草。一戶養馬一匹。江南民十一戶養馬一匹。官給善馬爲種。

率三牝馬置一牡馬每一百匹爲一羣羣設羣頭羣副掌之牝馬歲課一駒牧飼不如法至缺駒損斃者責償之其牧地擇旁近水草豐曠之地春時牧放游牝秋冬而入寺官以時巡行羣牧視馬肥瘠而勸懲之任滿吏部考其息多寡以爲殿最焉

閱武教塲諭諸將毋得縱恣害民

諭曰兵民相資汝等無耕耨之勞而充其食無織紉之苦而足其衣皆出於民也民勤苦衣食常有不足無知害民民受困弊是自損其衣食之本也

詔暫罷科舉今有司察舉賢才

上諭中書省臣曰朕設科舉以求天下賢才務得經明

行脩文質相稱之士以資任用。今有司所取多後生少年。觀其文詞。若可與有爲。及試用之。能以所學措諸行事者。甚寡。朕以實心求賢。而天下以虛文應之。非朕責實求賢之意也。今各處科舉。宜暫停罷。別令有司察舉賢才。必以德行為本。而文藝次之。庶幾天下學者。知所嚮風。而士習歸於務本。○上又命吏部訪求賢才於天下。曰。世有賢才。國之寶也。古之聖王。恒汲汲於求賢。若高宗之於傳說。文王之於呂尚。二君者。豈其智之不足也。而遑遑於版築鼓刀之徒。蓋賢才不備。不足以爲治。鴻鵠之能遠舉者。爲其有羽翼也。蛟龍之能騰躍者。爲其有鱗鬣也。人君之能爲治者。爲其有賢人而爲之輔。

也。今山林之士。豈無德行文藝之有稱者。宜令有司采舉。備禮遣送至京。朕將任用之。以圖至治。

三月癸卯。頒賜昭鑒錄于諸王。

先是。命禮部尚書陶凱等。采摭漢唐以來藩王善惡。可爲勸戒者。爲書會凱出叅行省。編輯未成。於是召秦王傅文原吉。翰林編脩王僎等。續脩之。至是書成。太子贊善大夫宋濂。爲序以進。賜名曰昭鑒錄。以頒賜諸王。上謂原吉等曰。朕於諸子。嘗切諭之一舉動戒其輕。一言笑斥其妄。一飲食教之節。一服用教之儉。恐其不知民之饑寒也。嘗使之少。恐饑寒。恐其不知民之勤勞也。嘗使之少。服勞事。但人情易至於縱。故令卿等編輯此。

書必時時進說使知所警戒然趙伯魯之失簡漢淮南之招客過猶不及皆非朕所望也

夏四月甲戌以工部尚書黃肅刑部尚書高萬傑爲廣西行省叅政刑部郎中高暉磨勘司令呂宗藝爲福建行省叅政

上諭之曰方面之任貴在廉明而戒於苛察貴在剛果而戒於急暴貴在有禮而戒於諂諛貴在有仁而戒於姑息凡行欲當理事欲成功上足以分朝廷之憂下足以慰都邑之望爲一道之福星如古之君子垂德望於不朽豈不偉哉卿等其勉之

五月壬寅頒賜祖訓錄于諸王

祖訓錄成其目十有三曰箴戒曰持守曰嚴祭祀曰謹  
出入曰慎國政曰禮儀曰法律曰內令曰內官曰職制  
曰兵衛曰管繕曰供用 上親爲之敘曰朕觀自古國  
家建立法制皆在始受命之君當時法已定人已守是  
以恩威加于海內民用康寧蓋其創業之初備嘗艱苦  
閱人既多歷事亦熟比之生長深官之主未諳世故及  
僻處山林之士自矜已長者甚相遠矣朕幼而孤貧長  
值兵亂年二十四委身行伍爲人調用者三年繼而收  
攬英俊習練兵之方謀與羣雄並驅勞心焦思慮患防  
微近二十載乃能剪除強敵統一海宇人之情僞亦頗  
知之故以所行與羣臣定爲國法革胡元之俗去姑息

之政。治舊俗。汙染之徒。且羣雄之強盛。詭詐至難服也。而朕已服之。民經世亂。欲度兵荒。務習奸猾。至難齊也。而朕已齊之。蓋自平武昌以來。卽議定著律令。損益更改。不計遍數。經今十年。始得成就。頒而行之。民漸知禁。至於開導後人。復爲祖訓錄一篇。立爲定法。大書揭於西廡。朝夕觀覽。以求至當。自是六年。凡七謄藁。至今方定。豈非難哉。蓋俗儒多是古而非今。奸吏常舞文弄法。自非搏採衆長。卽與果斷。則被其眩惑。莫能有所成也。今令禮部刊印成書。以傳永久。凡我子孫。欽承朕命。無作聰明。亂我已成之法。一字不可改易。非但不負朕垂法之意。而天地祖宗。亦將孚祐于無窮矣。於戲。其敬



承之。於是頒賜諸王，且錄於謹身殿東廡，乾清宮東壁，仍令諸王書於王官正殿，內宮東壁，以時觀省。上因謂侍臣曰：朕著祖訓錄，所以垂訓子孫。朕更歷世故，創業艱難，常慮子孫不知所守，故爲此書，日夜以思，具悉周至。紬繹六年，始克成編。後世子孫守之，則永保天祿。苟作聰明，亂舊章，是違祖訓矣。侍臣對曰：自古創業之主，其慮事周詳，立法垂訓，必有典則。若後世子孫不知而輕改，鮮有不敗。故經云：不愆不忘，率由舊章。上曰：日月之能久照，萬世不改其明。堯舜之道不息，萬世不改其行。三代因時損益者，其小過不及耳。若一代定法，有不可輕改，故荒陞厥緒，幾於二夏，顛倒典刑，幾於二商。

後世子孫當思敬守祖法。

詔定公侯以下家廟禮儀。

在公侯一品官別立祠堂三間於所居之東以祀高曾祖考并祔位。二品以上羊一豕一五品以上羊一豕一皆分四體熟而薦之不能具牲者設饌享之所用器皿隨官品第稱家有無几祭於四仲之月擇吉日或春秋分冬夏至亦可。

命天下州郡繪山川險易圖以進。

上以天下既平薄海內外幅員方數萬里欲觀其山川形勢關微阨塞及州縣道里遠近土物所產遂命各行省每於閏年繪圖以獻。

淮安侯華雲龍請設塞上諸關守禦從之

淮安侯華雲龍鎮守北平。遣使言塞上諸關東自永平薊州密雲西至五灰嶺外隘口通一百二十一處。相去約二千二百里。其王平口至官坐嶺口關隘有九。約相去五百餘里。俱係衝要之地。並宜設兵守之。若紫荆關及蘆花山嶺尤爲要路。宜設千戶守禦從之。

以河南府學訓導開濟爲國子助教。○盱眙縣民進瑞麥凡十六本。皆一莖二穗。監察御史答祿與權言天產嘉祥。皆所以兆國家之福。而爲聖世之徵。今瑞麥之產。乃上帝借草木之靈以彰君臣異體同心之象。又產于盱眙屬臨濠帝鄉也。是宜薦之宗廟以彰祖宗之神靈。且

新麥之登尚薦宗廟况瑞麥乎上曰以瑞麥爲朕所致則不敢當必歸之祖宗神靈御史之言良是乃命薦之宗廟

六月甲申胡人寇武朔等州大將軍徐達遣臨江侯陳德鞏昌侯郭子興擊却之○秋七月壬子以中書左丞胡惟庸爲中書右丞相○八月庚午翰林承旨詹同侍講學士樂鳳韶上釋奠先師孔子樂章

迎神奏咸和之曲奠帛奏寧和之曲初獻奏安和之曲亞獻奏景和之曲終獻與亞獻同徹饌奏咸和之曲送神復奏咸和之曲時遣御史大夫陳寧釋奠於先師孔子丞相胡惟庸言誠意伯劉基叅政馮冕等皆不陪祭

而受胙。上聞之曰：基等學聖人之道而不陪祀使弗學者，何以勸？既不預祭而享其胙，於禮可乎？其武人不知理道者，皆不足責。命停基冕俸各一月，寧坐不舉，亦停俸半月。自是不預祭不頒胙。

以儒士桂彥良爲太子正字。○以太子贊善大夫宋濂爲翰林侍講學士，知制誥仍兼贊善。○命禮官參考歷代帝王有功生民者立廟祀之。

監察御史答祿與權言：開物成務，先王旣正乎民彝，崇德報功，後世宜興乎祀典。苟不追尊前古，何由立教將來？謹稽經史，伏羲神農黃帝號稱三皇，盛德大業被於萬世，使天下後世三綱正，九法叙，三聖人之功莫大焉。

故堯舜禹湯文武相承而爲道統孔子顏曾思孟相傳而爲道學統以續其業學以傳其心後世有天下者舉不違其成法此其所以繼天立極而爲帝王之所崇豈但陰陽一方而已哉其在祀典法施於民則祀之著之禮經歷代宗守爰及我朝繼正統而有天下四海九州罔不臣服天下社稷宗廟之神皆得享其祭而躬祀三皇之禮獨闕焉宜於春秋躬行祀事庶成一代之典上以報往聖之功下以正萬姓之彝倫則道德尊嚴而政教脩舉矣上納其言命禮官參考歷代帝王開基創業之有功於生民者立廟祀之於是禮部尚書牛諒奏三皇開天立極有大功德於民京都有廟春秋享祀宜令

太常掌之。伏羲以勾芒配神農，以祝融配黃帝，以風后力牧配正位南面，祀以太牢。配位東面，祀以少牢。漢高祖光武、唐高祖、太宗、宋太祖、元世祖，宜令有司就各陵立廟，每歲仲春，以少牢致祭。商中宗、高宗、周成王、康王、漢文帝、武帝、宣帝、明帝、章帝、唐玄宗、憲宗、後唐明宗、周世宗、宋太宗、真宗、仁宗，亦宜令有司立陵廟，三年一祭，祭以少牢。上曰：五帝三王及漢唐宋創業之君，俱宜於京師立廟致祭，其餘守成賢君，令有司祭於陵廟，皆每歲春秋祭之。

詔禁四六文辭

上命翰林儒臣擇唐宋名儒表箋可爲法者，翰林儒臣

以柳宗元代柳公綽謝表及韓愈賀雨表進上命中書省臣錄二表爲天下式因諭羣臣曰唐虞三代典謨訓誥之辭質實不華誠爲千萬世法漢魏間猶爲近古晉宋以來文體日衰駢儷綺靡而古法蕩然矣唐宋之時名儒輩出雖欲一變而卒未能盡變近代制詔章表之類仍蹈舊習朕嘗厭其雕琢殊異古體且使事實爲浮文所蔽自今凡誥諭臣下辭務簡古以革弊習爾中書播告中外臣民凡表箋奏疏毋用四六對偶悉從典雅丙子胡寇河州入土門峽千戶王才戰死臨江侯陳德統兵擊敗之

陳德及鞏昌侯郭子與進兵至荅刺海子口遇胡兵擊



敗之斬首六百餘級生擒其同僉興都等七百餘人獲駝馬牛羊千餘頭餘衆潰去。

乙酉建歷代帝王廟于京師

其制畧如宗廟同堂異室爲正殿五間以爲五室中一室居三皇東一室居五帝西一室居夏禹商湯周文王又東一室居周武王漢光武唐太宗及西一室居漢高祖唐高祖宋太祖元世祖。

己丑遣使勅諭大將軍徐達等

上以大將軍徐達等久出師遣使齎勅諭之曰凡賢人君子不以勤怠易其始終不以富貴忘其艱難卿等與朕平定天下勲業已成而瑣瑣殘胡不能盡討致連年

出師勞民擾衆孰任其咎。朕姑爲爾言之。今駐師去處皆有房宇妻妾。雖在外實同家居。一也。肥馬輕裘縱意馳騁。不知下人饑寒之憂。二也。燕樂玩情。因循苟且。不能謀事。三也。軍士連年暴露。披堅執銳。朝夕不息。意圖決勝。爾又失筭。卒無成功。四也。昔田單攻狄。久之不下。問計于魯仲連。仲連曰。將軍在卽。墨時飲食起居。與士卒同。身先於士。所以獲生而致勝。今將軍東有夜邑之奉。西有淄上之虞。黃金橫帶。馳騁乎淄澠之間。有生之樂。無死之心。所以不勝也。卿等皆起布衣。一旦至此。遂忘昔日之艱難。豈不犯仲連之誚乎。卿等宜益懋其功。以副朕懷。○乙未。復遣使勅諭大將軍徐達等曰。近聞

王保保欲來求和必非實意其部將普賢奴乃兒不花  
魁的斤等各將人馬恐假此來擾我邊須多伏精兵盛  
爲之備索其情僞毋使失計近術士張鐵冠言子月有  
戰卿等未可卽還凡出入塞上必常如遇敵非數千騎  
不可行也曠漠中如遇敵當加慎焉發去所獲當道驢  
盧國公之子至可撫諭而遣之

九月始分六科各設給事中凡八十一人從七品○壬寅  
命翰林學士承旨詹同侍講學士宋濂等纂脩大明日歷  
乙卯命諸司常事啟皇太子重事乃許奏聞

上謂皇太子曰人君統理天下人情物理必在周知然  
後臨事不惑吾自起田里至于今日凡治軍旅理民事

無不盡心。恒慮處事未當。故常深念。古人爲治必廣視聽。凡言之善者。吾卽行之。不善者。吾雖不行。亦思繹至再。果不可行。然後置之。夫慮事貴明。處事貴斷。庶幾不眩。况汝生長宮掖。未涉世故。若局於見聞。則視聽不廣。且目雖能視。所見不踰於國耳。雖能聽。所聞不越於庭。而欲以區區知識。決天下之務。能一一當理難矣。汝宜親賢樂善。以廣聰明。逆已之言。必求其善。順已之言。必審其非。如此則是非不混。理欲判然。天下之事。可得而治矣。汝其敬之。毋忘朕訓。

戊午鑄太和鐘成

其制倣宋景鐘。以九九爲數。高八尺一寸。拱以九龍。植

以龍廈建樓於圓丘齋官之東北懸之每郊祀候駕動則鐘聲作既升壇鐘聲止則衆音作禮畢升輦又擊之候導駕樂作則止然未有以名之禮官奏曰昔皇帝有五鐘其一曰景鐘景大也惟功大者其鐘大故宋之鐘亦緣是以爲名請名之曰景鐘上曰古鐘名宜更之遂取周易保合太和之義更名之曰太和鐘

壬戌改臨濠府爲中立府臨濠大都督府爲中立行大都督府○高麗王顥遣使貢馬五十匹却之

高麗王遣其大獲軍金甲兩等貢馬五十匹甲兩言道云三匹及馬至京乃如數詢之云私馬二匹欲進東宮因道云遂以備數上以其不誠却其貢賜顥璽書責之

田州府總管黃志威招撫奉義等州。一百一十七處人民皆來款附。詔定土官家用祭服公服。○命刑部尚書劉惟謙詳定六明律。

上旣命頒行律令。恐小民不能周知。命大理卿周禎等直解其義。頒行民間。旣又命儒臣同刑官共講唐律目錄二十餘條。進覽上。爲斟酌擇其可行者從之。至是重命惟謙詳定大明篇目。皆准于唐。一曰笞刑五。自一十至五十。每一十爲一等加減。二曰杖刑五。自六十至一百。每一十爲一等加減。三曰徒刑五。自徒一年杖六十至徒三年杖一百。每杖一十及半年爲一等加減。四曰流刑三。自二千里杖一百。至三千里杖一百。每百里爲

一等加減。五曰死刑二。絞斬。米用舊律二百八十八條。舊令改律三十六條。因事制律三十一條。掇唐律以補遺一百二十三條。合六百有六。分爲三十卷。其間損益務合輕重之宜。每成一篇。輒繕寫以進。上命揭于兩廡之壁。親加裁定。及成。翰林宋濂爲表以進。命頒行天下。已未。潞州遣官貢人參却之。

潞州貢人參。上諭之曰。朕聞人參得之甚艱。豈不勞民。今後不必進。如用。當遣人自取。因謂省臣曰。往年金華貢香米。朕用止之。遂以苑中種田數十畝。每耕耔割穫之際。親往觀之。足以自適。及所計入。亦足供用。朕飲酒不多。太原歲進葡萄酒。自今亦令其勿進。國家以養民。

爲務。豈宜口腹累人哉。常聞宋太祖家法。子孫不得於遠方取珍味。甚得貽謀之道也。

乙酉遣田儼程斗南等使緬國。不至而還。

緬國在雲南之西南。與八百古城接境。謂之緬甸。元時最強盛。麓川平緬皆服屬之。上聞其嘗通貢于元。因遣儼等齎詔往諭之。值安南占城以兵相攻。道阻不通。留二年餘。不得進。召還。

大將軍徐達遣將擊王保保兵於懷柔之三角村。擒其平章康同僉而還。○乙未遣使勅諭大將軍徐達。

勅曰。爾諸將屯軍塞上。爲日頗久。軍中動靜。王保保安得不知。兵法曰。多算勝。少算不勝。況無算乎。此確論也。



近有自軍中來者言王保保部下之卒有盜印詣軍門降者觀其來意甚篤然古之智將謀慮深長有鬼神不測之機朕竊爲將軍慮之爾所率步騎多王保保部屬當其來降實迫事勢非出誠心今隨爾往征其心有不測當以誠待之宜亦以計隄防今王保保力勢雖微然多詐謀必籌之萬全而後動能不戰而屈之乃爲上智爾其勉之

十二月詔使王禕遇害於雲南

禕秀爽奇敏初徵署中書省掾進平江西頌上覽喜曰吾固知浙東有二儒卿與宋濂耳學問之博卿不如濂才思之雄濂不如卿歷官漳州通判召脩元史拜翰林

待制知制誥兼國史編脩五年往諭雲南梁王曰皇上  
聰明神聖天人所歸惟爾僻在西南久阻聲教故遣使  
者來諭意亟宜奉版圖歸職方官封如故身名俱全不  
然天討旦夕且至梁王不聽館別室數日又諭曰朝廷  
以雲南百萬生聚不欲殲于鋒刃曾不聞元綱解紐天  
兵西征不五六年天下大定爾恃險遠屢拒明命龍驤  
鷁艦會戰昆明悔無及矣梁王駭服有降意卽爲改館  
會元遣使脫脫至雲南覘知梁王有二心欲迫殺朝使  
以固其意梁王持兩可不決匿禕民間脫脫聞之謂梁  
王梁王不得已出禕與脫脫相見脫脫欲屈禕禕罵曰  
天訖汝元命我朝實代之汝知燭火餘燼尚欲與日月

爭光耶。我將命遠來。豈爲汝屈耶。有死而已。顧梁王曰。汝若殺我。大兵旦夕至矣。竟被害。瘞地藏寺北。年五十。二子紳。走雲南。求父遺骸不得。述滇南慟哭記。後贈翰林院學士。奉議大夫。謚文節。開國以來。文臣有謚。自禔始。

戊戌詔併僧道寺觀。禁女子不得爲尼。

上以釋老二教近代崇尚太過。徒衆日盛。安坐而食。蠹財耗民。莫甚於此。乃令府州縣止存大寺觀一所。併其徒而處之。擇有戒行者。領其事。若請給度牒。必考試精通經典者。方許。又以民家多以女子爲尼姑。女冠。自今年四十以上者聽。未及不許著爲令。

甲寅七年春正月庚午令六部官毋得輕調有年勞者就本部陞用○詔定親王國中居名

其前殿曰承運中曰圓殿後曰存心四城門南曰端禮北曰廣智東曰體仁西曰遵義上曰使諸王能觀名思義斯足以藩屏帝室永膺多福矣

召諭太子宫臣

上召太子宫臣諭之曰汝知所謂重器乎對曰豈非商彝周鼎乎上曰汝所謂商彝周鼎者此非重器也太子者天下之重器人有彝鼎尚知寶愛太子承主器之重豈得不寶愛之乎寶愛之者必擇端人正士以爲輔翼朝夕與居使其熟聞善言不邇諛行自然漸漬以成其

德若惟委之於便嬖近習。是委重器於塗而不知寶愛之矣。汝等日輔太子。講論誦說之時。必導之以正。使其道明德立。才器充裕。庶幾他日克勝重任。可以副朕所望矣。

建閱江樓於獅子山

山在金川門內。上昔屯兵。立黃赤二幟。破陳友諒之所也。樓成。上親爲之記。

詔釋成安縣丞唐詢之獄

廣平府成安縣丞唐詢。蒞事甫三月。以細故禁繫三年。自獄中上書陳情。上曰。非大故而繫獄三年。若不幸而死。詢何辜。卽命釋之。逮問其官吏淹禁者。

太原府繁峙縣主簿于文采爲大同知府

時文采上言山西行省并按察司官吏事多不法按有驗上曰文采職居下僚能不避權勢舉言其非可嘉也宜陞擢以旌異之故有是命

二月丁酉朔詔免平陽太原二府并汾州等縣今年田租  
○癸亥臨江侯陳德獲韃靼禿魯魯迷失等九十七人於會  
寧等處六安侯王志獲韃靼一百餘人於朔州等處俱送  
京師○勅諭徐達分布六安侯王志南雄侯趙庸駐山西  
榮陽侯楊璟汝南侯梅思祖駐北平達與李文忠馮勝還  
京○以兵部尚書劉仁刑部主事鄭九成爲廣東行省叅  
政

劉仁鄭九成陛辭上諭之曰嶺海在京師數千里外方面之寄必得重臣以授之庶可以輯寧其人茲特命卿等以往凡政事之施宜恩威兼濟若爲政一以恩而無威則寬而無制事不立矣若徒以威而不仁則嚴而無恩民不堪矣惟恩不流於姑息威不傷於刻暴則政事自舉民生自遂下之爲郡縣吏者轉相視倣雖嶺海之遙朝廷無可憂矣仁等頓首受命以行

乙亥蘭州八里麻民郭買的反誘番兵入寇

詔立賞格購捕之蘭州衛遣其兄着沙與其弟火石歹往招之郭買的不從着沙火石歹夜斬其首以歸本衛以其事聞請賞之上曰買的反固當死然爲兄弟者

告之不從。執之而已。手自刃之。有乖天倫。若賞之。非所以令天下也。但以其所獲牛馬給之耳。

壬辰廣西行中書省左丞方國珍卒。○安南陳叔明遣使上表謝恩。辭老請以弟煥代視事。許之。○夏四月己亥。都督僉事藍玉率兵攻興和。故蒙古將脫因帖木兒棄城走。○壬寅。承道桂陽諸州蠻寇竊發。命金吾右衛指揮陸齡討平之。○癸卯。命置鐵冶所官。

凡一十三所。江西南昌府進賢鐵冶。歲一百六十三萬斤。臨江府新喻冶。袁州府分宜冶。歲各八十一萬五千斤。湖廣興國冶。歲一百十四萬八千七百八十五斤。蘄州府黃梅冶。歲一百二十八萬三千九百九十二斤。山



東濟南府萊蕪冶。歲七十二萬斤。廣東廣州府陽山冶。歲七十萬斤。陝西鞏昌冶。歲一十七萬八千二百一十斤。山西平陽府富國豐國二冶。歲各二十二萬一千斤。太原府大通冶。歲一十二萬斤。潞州潤國冶。澤州益國冶。歲各十萬斤。

丙辰命宋國公馮勝。衛國公鄧愈。中山侯湯和。鞏昌侯郭子興。復鎮北邊。○召廣東行省叅政汪廣洋入爲左御史大夫。○戊午都督僉事金朝興等獲故蒙古太尉盧伯顏不花平章帖木兒不花等。於黑城子等處。河南都指揮使繆道獲故蒙古叅政等官。於聖山兒等處而還。○五月丙寅翰林學士承旨詹同侍講學士宋濂請類皇明寶訓從

之

五月丙寅朔。大明日曆成。自 上起兵臨濠。至卽位六  
年癸丑冬十二月。凡征伐次第。禮樂沿革。刑政施設。羣  
臣功過。四夷朝貢之類。莫不具載。合一百卷。詹同宋濂  
率諸儒士進命藏之金櫃。其副藏於秘書監。濂等又言  
於 上曰。日曆藏之天府。人欲見之。則不可得。臣請如  
唐太宗貞觀政要。分類更輯聖政爲書。以傳於天下。後  
世 上從之。於是分爲四十類。自敬天至制蠻夷。釐爲  
五卷。總四萬五千五百餘言。名曰皇明寶訓。自是以後  
凡有聖政。史官日紀錄之。隨類增入。

壬申高麗國王王顥遣使奉表貢方物。却之。

先是高麗王顥遣使金甲兩等貢馬五十疋甲兩匿馬  
二疋欲自進於東宮詐言道亡二疋而以已馬足之上  
以其不誠却其馬賜顥璽書懲治使者至是復遣使周  
誼鄭它等奉表貢方物中書省奏高麗表稱禮送大府  
監按元時有大府監主收進貢方物本朝未嘗設此高  
麗入貢已久豈不知此而妄言之意涉不誠上命還  
其貢賜璽書責以大府監之失

甲午禮部尚書牛諒上考定進膳禮

奏云古禮凡太祀齋之日宰犢牛爲膳以助精神上曰  
太牢非常用致齋三日而供三犢所費太多夫儉可以  
制欲澹可以順性若無節制惟事奢侈徒增傷物之心

何益事神之道。諒曰。周禮是古人所定。非過侈也。上  
曰。周官之法。不行於後世多矣。惟自奉者。乃欲法古。其  
可哉。

日本國遣使來朝。貢馬及方物。却之。

時日本國持明與良懷爭立。使者齎其國臣之書達中  
書省。而無表文。上命却其貢。

六月戊午。汰北方府州縣官。

上命吏部曰。古稱任官惟賢才。凡郡得一賢守。縣得一  
賢令。足以致治。如潁川有黃霸。中牟有魯恭。何憂不治。  
今北方郡縣有民稀事簡者。而設官與煩劇同。祿入供  
給。未免疲民。可量減之。於是吏部議減北方府州縣官。

三百八人

壬戌西域上煙帖木兒遣使來朝貢

西域撒里畏兀兒安定王上煙帖木兒遣其府尉麻答兒千戶刺爾嘉來朝貢鎧甲矛劍等物撒里畏兀兒者韃靼別部也其地廣袤千里去甘肅一千五百里東抵罕東西距天可里北趨瓜沙州南界土蕃居無城郭以氊帳爲廬舍產多騾馬羊牛至是來朝貢詔遣使賜牛煙帖木兒織金文綺四疋麻答兒等羅衣二襲仍命召其酋長立爲四部給銅印曰阿端曰阿真曰苦先曰帖里

秋七月甲子朔增圓丘方丘從祀更定其儀

園丘第一成設昊天上帝正位。仁祖淳皇帝配位。如舊。  
第二成東設大明位。西設夜明位。內壇之內東西各三  
壇。星辰一壇。分設於東西星辰之次。東則太歲及五嶽  
壇。西則風雲雷雨及五鎮壇。內壇之外東西各二壇。東  
四海壇。西四瀆壇。天下神祇二壇。設於海瀆之次。方丘  
第一成設皇地祇正位。仁祖配位。如園丘。第二成東設  
五嶽位。西設五鎮位。內壇之內東西各二壇。東四海壇。  
西四瀆壇。天下山川壇二。分設於海瀆之次。內壇之外  
東西各設天下神祇壇一。

左副將軍李文忠克大石崖斬故蒙古宗主朶朶失里及其承旨百家奴等。○西番酋長獻葡萄酒却之。

上謂中書省臣曰。飲食衣服。貴乎有常。非常有而求之者。則必有無窮之害。昔元時造葡萄酒。使者相繼於途。勞民甚矣。豈宜效之。且朕性素不喜酒。但中國自有秫米。供釀何用。以此勞民。遂却之。使無復進。賜酋長文綺襲衣。遣還。

戊戌遣故蒙古威順王子伯伯齋詔往諭雲南

詔曰。順天者存。逆天者亡。古今定論。禍福常理也。朕起自布衣。削平羣雄。戡定禍亂。今已七年。江夏旣安。四夷順附。無強凌弱。衆暴寡之患。其款服臣順者。咸得保其境土。共享承平之福。惟爾雲南梁王把匝剌瓦密爾。乃元君遺派。受封西南。孤處遐荒。不諒天意。猶未臣服。以

若所爲非貽禍於大理之民必終斃於大理之手斯三  
禍機必蹈其一有不可逃何也蓋雲南土地人民本夫  
理所有自漢通中國稱臣朝貢至唐宋皆受王封其來  
久矣昔因爾元滅其王而統其地因循百年未復故物  
彼時劫於勢力今元祚旣傾天命已革爾尚據其境土  
不思改圖禍患之報將不旋踵今特遣爾親族威順王  
之子往諭如上順天命下契人心卽奉貢來庭則改授  
印章爾仍舊封羣下皆仍舊官享禍于彼不然朕當別  
遣使者直抵大理依唐宋故事賜以王號合兵加討悔  
將無及於戲胡虜無百年之運今已足信轉移之機在  
人自審時不可失爾其思之 甲辰遣使齎詔諭大理



卷之六  
二十四  
曰始因有元失馭海內雲擾羣夷無主朕自洪武元年  
戊申秋八月羣雄盡平復我漢人故國統一中夏於今  
七年四夷諸番皆已稱臣入貢惟爾大理未嘗遣使近  
稽載籍大理在唐宋時受封王爵至元削去國名止稱  
土官今其國乃元君遺派梁王者主之未復故封朕命  
臣僚議準唐宋故事封爾段氏爲大理國王故特遣使  
先諭朕意使回當發印誥令爾王開國理民同享承平  
之福爾其審之

丙辰左副將軍李文忠追擊胡虜於豐州破之九月戊  
辰中書平章政事李思齊卒丁丑遣崇禮侯買的里八  
剌北還

上謂廷臣曰。草木無心。遇春而茂盛。遇秋而零落。氣之所感。猶知榮悴。況於人乎。崇禮侯買的里八剌。南來已五載。今既長成。能無父母鄉土之情。宜遣之還。於是厚禮而歸之。選老成宦者。咸禮表上花帖木兒。二人送行。復遺其父愛猷識理達臘。織金文綺及錦衣各一襲。買的里八剌辭行。上諭之曰。爾本元君子孫。國亡就俘。曩欲卽遣爾歸。以爾年幼。道里遼遠。恐不能達。今既長成。朕不忍令爾久客於此。故特遣歸。見爾父母親戚。以全骨肉之愛。又諭二宦者曰。此爾君之嗣也。不幸至此。長途跋涉。爾善視之。因致書與愛猷識理達臘曰。順天者昌。逆天者亡。古今通論。自古國家興廢。氣運之常耳。

豈人力所能爲哉。且君之父子當中國兵多將廣之時。權不能自持。故兵多者。蘊莽操懿溫之志。次者頡頏互相攻擊。日廢生民。下者東送款西歸附。剝民以供上下。君之父子曾出一令而誰何之與。今日之事如此。君尚迷留不省者何。蓋在至正之間。兵多將廣。尚不能駕馭。又被逼挾。今之衆壯弱不過二萬流離邊境。意圖中興。君之謀略不知何如耳。君自度今時之權比至正時低昂若何。以此觀之。豈不愚哉。君以萬騎或七八千騎欲與全盛中國相抗。予又不知輕重若何。予謂君明天理若能悟我所言。必得一族於沙漠。暫爾保持。或得善終。何以見之。君之祖宗有天下者。幾及百年。養育之久。生

齒之繁。以此天運雖去。而祀或未終。此亦天理之常也。君若不悟。不效古人之事。他日加兵於彼。禍有不可測者也。昔君在應昌。所遺幼子南來。朕待以殊禮。已今年。今聞粵魯去全寧不遠。念君流離沙漠。無寧歲後嗣未有。故特遣咸禮等。護其歸。庶不絕元之嗣。君其審之。已卯翰林院奏進回鑾樂歌

先是上以祭祀還宮。宜用樂舞前導。命翰林儒臣撰樂章。以致敬慎鑒戒之意。諭之曰。古人詩歌辭曲。皆寓諷諫之意。後世樂章。惟聞頌美。無復古意。夫嘗聞諷諫。則使人惕然有警。若頌美之辭。使人聞之意怠。而自恃之心生。蓋自恃者日驕。自警者日強。朕意如此。卿等其撰

述母有所避。至是上所撰神降祥神貺酣酒色荒禽荒諸曲凡三十九章。曰回鑿樂歌。其辭皆存規諫。其舞分爲八隊。隊皆八人。禮官圖其制以上。命樂工肄習之。冬十一月壬戌。孝慈錄成。命頒行之。

先是貴妃孫氏薨。勅禮部定喪服之制。禮部尚書牛諒等奏曰。周禮儀禮。父在爲母服期年。若庶母則無服。上曰。父母之恩一也。而喪服低昂。若是其不近於人情甚矣。乃勅翰林學士宋濂等曰。養生送死。聖人之大政。諱亡忌疾。衰世之陋俗。三代喪禮。節文尤詳。而散失於衰周。戾於暴秦。漢唐以降。莫能議此。夫人情有無窮之變。而禮爲適變之宜。得人心之所安。卽天理之所在。爾

等其考定喪禮於是濂等考得古人論服毋喪者凡四  
十二人願服三年者二十八人服期者十四人奏之  
上曰三年之喪天下之通喪今觀願服三年喪比服期  
年者加倍則三年之喪豈非天理人情之所安乎乃立  
爲定制子爲父母庶子爲其母皆斬衰三年嫡子衆子  
爲庶母皆齊衰杖朞仍命以五服喪制並著爲書使內  
外有所遵守其叙服有八曰斬衰三年曰齊衰杖朞曰  
齊衰不杖朞曰齊衰五月曰齊衰三月曰大功九月曰  
小功五月曰緦麻三月至是書成名曰孝慈錄 上親  
爲之序命錄諸梓而頒行之

壬午太陰犯軒轅左角

十二月甲辰御註道德經成

上謂儒臣舉老子所謂五色令人目盲五音令人耳聾與聖人去甚去奢去泰之類曰老子此語豈徒托之空言於養生治國之道亦有助也但諸家之註各有異見朕因爲註以發其義

監察御史答祿與權請行禘禮

御史答祿與權言古之王天下者既立始祖之廟又推始祖所自出之帝祀之於始祖之廟而以始祖配之故曰禘禘者大也王者之大祭也周祭太王爲始祖推本后稷以爲自出之帝今皇上受命已七年矣而禘祭未舉宜命羣臣參考酌古今而行之以成一代之典事下禮部太常寺翰林院議以爲虞夏商周世系明白其始

祖所從出可得而推故禘禮可行漢唐以來世系無考莫能明其始祖所自出當時所謂禘祭不過祫祀祫主序昭穆而祭之乃古之大祫非禘也宋神宗嘗曰禘者所以禘祖之所自出莫知祖之所自出禘禮不可行也今國家旣已追尊四廟而始祖之所自出者未有所考則於禘祭之禮似難舉行上是其議

遣靖海侯吳禎往浙東收籍方氏故兵

時遣靖海侯吳禎往浙東收籍方氏台溫明三郡故兵禎旣至三郡無賴惡少挾私逞怨蔓引平民富室爲兵瀕海大擾寧海知縣王士弘曰吾寧獲死罪不可誣良民爲兵卽上封事辭甚懇切上卽詔罷之三郡之民賴



以復安。士弘潞州人。擢南雄府通判。卒于官。三郡之民  
悲思之。

詔天下有司衛所體訪存恤

詔曰。曩因天下大亂。死者不可勝數。生者備歷艱辛。已  
有年矣。朕起自布衣。削羣雄。定禍亂。改元洪武。今已七  
年。才疎德薄。日夕慮上帝有責思之再三。惟因兵戈。罹  
殃者。朕失撫養存問。蓋軍士爲朕開拓疆宇。奮不顧身。  
歿於戰陣。屍不至家。魂無所依。父母高年。妻寡子幼。出  
且捐棄。至今不能存活。此朕之過也。民間經兵避難。眷  
屬乖離。至今不能會聚者有之。或子歿親老而無養。親  
歿子幼而無依者有之。亦朕之過也。興官及此。實可憫。

傷。今詔令下有司。用心體訪。各具名以聞。朕當存養。使不失所。凡出征軍官。間有鎮守邊境。身死邊方。父母年老。妻寡子幼。雖嘗給糧養贍。猶慮未周。各衛所宜審訪。優給待其子稍長。卽令承襲。如無承襲之人。所司稟送。送至京。官爲存養。其南北征伐軍士。歿於邊遠。棄遺父母妻子。貧窮無倚。所司驗實。稟送至京。官爲存養。若子雖幼可依。及有親屬而願留者。聽從其便。官仍給糧養贍。兵興以來。各處人民避難流移。或有父南子北。骨肉離散。願完聚者。有司送還鄉里。或有身死他鄉。所遺老幼願還鄉者。聽及各處縣寡孤獨并篤疾之人。貧窮無依。不能自存者。所司官給衣糧養贍。官員任宦遠方。歿

於任所妻子貧窮不能還鄉者所在官司送還鄉里於  
乎君臨天下者所以爲民也或君願治而民乖或民樂  
善而君昏臣或賢而君不德君或懦而臣則剛此古今  
所難也所司奉行毋倚法爲姦以干刑憲○又釋罪詔  
曰青災肆赦怙終賊刑具載于書至今明焉漢唐至元  
懦君承業權由姦佞因有大赦雖開釋君子之過愆而  
奸頑之徒得爲漏網之魚古人謂小人之幸君子之不  
幸豈不信然朕爲天下生民主恒恐乖聖人明刑慎罰  
之意中書有條陳獄囚若果故犯但答罪以上俱各不  
原其餘註誤過失因人致罪者悉皆宥之

以兵部員外郎楊其爲山西按察副使監察御史咨祿與

權爲廣西按察僉事

上諭之曰風憲之設在肅紀綱清吏治非專理刑爾等往脩厥職務明大體毋效俗吏拘拘繩墨之末處事之際毫髮須謹善雖小爲之不已將爲全德惡雖小積之不已將爲大慙可不慎哉

乙卯命刑部侍郎李浩通事梁子名使琉璃國市馬

庚申罷禮部尚書牛諒諒初爲尚書以怠職降本部主事復爲尚書仍不任職罷

詔衛國公鄧愈中山侯湯和還京

江左陸翀之手校